

# Di'ibũ Dios Myooy Ja Jesukristũ Es Ttuknijáwudũt Ja Myũduumbũty

**1** <sup>1</sup>Di'ibũts ngũxjaapy mǎ tyǎdu neky, yũ'ũ di'ibũ Dios myooy ja Jesukristũ es ttuknijáwudũt ja myũduumbũty di'ibũ tsojkap es tsojk tyunǎ'ǎñ jyatǎ'ǎñũty. Jesukristũ tkejxy nidu'ugũ 'yanklũs mǎ ẽj, Fwank, Jesukristũ myũduumbũ, es tũts xytyuknijawũ tũgekyũ tyǎadũ. <sup>2</sup>Paaty mǎ tyǎdu neky nnikajxpétyũts ko tyũy'ajtũnũty di'ibũts n'ijx nmũdoo, ko yũ'ũ ja Diosũ 'yayuk es di'ibũ Jesukristũ xytyuk'ijx xytyuknijǎ'ajũts.

<sup>3</sup>Dios kunu'xudũp di'ibũty kyajxtũp, es kunu'xudũp nandũ'un di'ibũ myũdeepy ja myadya'agyũ tyǎdu ayuk, es tmũbáktũt es tkuydyũndũt di'ibũ ijtp yǎǎ kũxjǎ'ay, mũt ko tũ wyingóñ ja tiempũ mǎ tyunǎ'ǎñ jyatǎ'ǎñũty.

## Fwank tnijayũ ja mũbũjkrũtyjũk nijũxtujk pekypyũ

<sup>4</sup>Ëj Fwank. Nnijáyũts yũ mũbũjkrũty di'ibũ naymyujkudũp mǎ jũxtujkũ kajpn Asyũ ñǎǎxóty. Wa'an ja Dios mgunu'xudũ es mmo'oyũdu ja agujk'ajt jotkujk'ajtũn, ja Dios di'ibũ ijtp, dũ'uñũm 'yity, es dũ'uñũm 'yitǎ'ǎñ. Nandũ'un mgunu'xudũt ja Espírítũ Santũ es mmo'oyudũt ja agujk'ajt jotkujk'ajtũn, ja Espírítũ Santũ di'ibũ ijtp mǎ uñǎaybyajn mǎ Dios yajkutíky, es ttuñ jũxtujk naxũ tuunk. <sup>5</sup>Es nandũ'un ja Jesukristũ, di'ibũ ñikajxpejtypy ja tũy'ajtũn, mgunu'xudũt es mmo'oyudũt ja agujk'ajt jotkujk'ajtũn, di'ibũ jawyiin jikyryũjũk ko 'ye'ky, es tyam yajkutíky mǎ nidũgekyũ naxwĩnũdu jǎ'ayũdyũ ryey. Jesukristũ xytsyojkm, tũ xyajwátsum ja nbojpn'ajtũm mũt ja ñe'pyñ, <sup>6</sup>es tũ xpyũjtákũm yajkutujkũp es teedyũty, es nmũdu'unũm ja Dios Teety. ¡N'ok'awdajtũm ja Jesukristũ di'ibũ winũ xũũ winũ tiempũ tmũdaty ja mũj'ajtũn esũ muk'ajtũn! Wa'an dũ'unũty.

<sup>7</sup>Ixtũ, Kristũ miimp yoodsóty. Nidũgekyũ naxwĩnũdu jǎ'ay t'íxtũt, es extũ ja'ajũty di'ibáty yajkruuzpajtũdu; es nidũgekyũ naxwĩnũdu jǎ'ayũty jyũ'ũy yǎ'axtũt ko t'íxtũt. Es dũ'un jyatǎ'ǎñ. Wa'an dũ'unũty.

<sup>8</sup>Nindsũn'ajtũm Dios, di'ibũ tũgekyũ muk'ajtũn myũdajtypy, yũ'ũ dũ'un jũnǎǎmp: “Ëjtsũ dũ'un éxtũm ja A es éxtũm ja Z, ẽjtsũ dũ'un ja jawyiimbũ es ja tim okpũ, di'ibũ ijtp, dũ'uñũm 'yity, es dũ'uñũm 'yitǎ'ǎñ.”

## Fwank t'ixy ja Kristũ

<sup>9</sup>Ëj Fwank, mmũmũbũjkrũty. Mũt yũ'ũgyũjxmu Jesús ẽj n'ítỹts mũt miidsũty mǎ Diosũ kyutujkũn, ayo'on es ma'xtujkũn. Tũts xyjapũjtǎ'aktũ éxtũmũ tsimyjya'ay yǎ mǎ islũ di'ibũ xyũ'ajtypy Patmũs, mũt ko

ngajxwa'xyuts ja Diosu 'yayuk es nnigajxy nnimadya'agyuts ja Kristu. <sup>10</sup>Ma tu'ugu domingu xuu ja Espiritu Santu xyñigudákuts. Nétuts nmudooy éxtum pún muk kyajxy n'axku'uyuts mut tu'ugu ayuk, du'un éxtum ya'axy ja trompetu, <sup>11</sup>es xy'anmaayuts:

—Kuxja'ay nekykuyjxm di'ibu m'ijxy, es tuknigaxu tadu neky ja mubujkputy di'ibu naymyujkadup ma tyadu juxtujkpa kajpn: Éfesu, Esmirna, Pérgamu, Tyatiiru, Sardus, Filadelfyu esu Laodiseeu.

<sup>12</sup>Nwa'kambijtyuts es n'ixa'añuts pándsu dun xymyugajxp. Nétuts n'ijxy juxtujku oorú kandaleeru, <sup>13</sup>es kujk'aay ma tadu kandaleeru, n'ijxyuts kyaxe'eky éxtum tu'ugu yedyujk, es ñaywyítxuty yeñ, extu tekyjyujp'ambaat, es tmudaty tu'ugu 'yooru kaatsywyuun di'ibu jantsy mujú 'yok. <sup>14</sup>Yu wyaay poop éxtumu lanu pooppu, es éxtumu tsajp'e'pyky, esu wyiin du'un kyaxe'eky éxtumu junya'angun. <sup>15</sup>Yu tyeky jantsy tu'xp, éxtumu bronsu ko muk 'yambeky; esu kyajxy jantsy muk, éxtum 'yuutsy pyumimiy ja mujú nñudáx. <sup>16</sup>Ma yu 'yaga'añgyu'u tmudaty juxtujku madsa'a, esu wyiin jyujp tu'xp éxtum ko tye'xy ja xuu mut winu myujaa. Es ma 'yaa pyudsemy éxtum tu'ugu espaadu jajpki'pyñ es majtsku 'yaa.

<sup>17</sup>Kots n'ijxy, ngudaayuts tyeky'ujxy éxtumu o'kpu. Es yu'u tyuknikooñuts ja 'yaga'añgyu'u, es xy'anmaayuts:

—Katu mdsu'ugu. Ujtsu du'un ja jawyiimbu es ja tim okpu. <sup>18</sup>Ujtsu du'un di'ibu jiky'ajtp. Tats n'ok'o'kpu, nétuts njikypyejky, es njiky'átyuts winu xuu winu tiempu, es nmudajtypyuts ja kutujkun esuts nyajjikypyákut ja o'kputy. <sup>19</sup>Kuxja'ay di'ibu tu xy'ixy, di'ibu jaa tyam, es di'ibu ya'ixaamp óknam. <sup>20</sup>Yu'u du'un 'yandijpy ja ayu'udsyu winma'añ, ja juxtujkpu madsa'a di'ibu tu xy'ixy madsu n'aga'añgyu'u es ja juxtujkpa oorú kandaleeru. Ja juxtujkpa madsa'a ja'a 'yandijpy ja juxtujkpa n'ayuk kajxwa'xputu ma ja mubujkputujk ñaymyúkadu, esu juxtujkpa kandaleeru ja'a 'yandijpy ja mubujkputy di'ibu naymyujkadup ma juxtujkpa kajpn.

### Ayuk yajtuknigéxy ja mubujkputujk jap Éfesu

**2** <sup>1</sup>Du'un xyñijáyut yu n'ayuk kajxwa'xputu di'ibu ijtp ma ja mubujkputujk ñaymyúkadu jam Éfesu. “Du'un jyuna'añ di'ibu myudajtypy juxtujku madsa'a 'yaga'añgyu'ujóty es jyudity kujk'aay ma tadu juxtujkpa oorú kandaleeru: <sup>2</sup>Uj nnija'abuts di'ibu mduundup, wi'ix mmuktundu, es ja ma'xtujkun di'ibu mmudajttup. Es nnija'abuts ko kyaj mbaat xymyuma'xtúktu ja axuk ja'ayaty. Nan nnija'abuts ko tu xywyinma'añ'ixtu di'ibu nugoobu ñayñigajxudu ko yu'u 'yapóstaluty, es tu xyajnidu'xtu ko yu'udyu andákruty. <sup>3</sup>Tu xymyudánudu es xytyuknaxtu ja ayo'on mut ujtskyujxm, es ni tu mgatsipka'axtu. <sup>4</sup>Per ma miidsaty tam tits nga'oyjya'ap, yu'u ko kyaj xy'oknakytsyojknudats éxtum jawyiñup. <sup>5</sup>Jamyatstu éxtum tuuyup xytsyojktuts es yajxónuts xymyuduundu. Yajjumbittu mjet es jiky'attu jatugok éxtumu naty jawyiin. Pún kyaj mjodumbittu, nninujxtup es nbujkadut ja mgandaleeru ma 'yity. <sup>6</sup>Oyu du'un xytyundu ko xkyatsoktu ja nikolátyudyu 'yaxuk jiky'ajtun, mut ko uj nandu'un n'axuk'ijxpyuts. <sup>7</sup>Di'ibu mudoodup, wa'an tjaygyúkadu di'ibu ja Espiritu Santu 'yanmaaydyubu tadu mubujkputujk ma ñaymyúkadu. Pún

madakp, tyaadu nmo'oyuups es tja'xut ja ujs tuump di'ibu yajjiky'ajtp es tsajpótm 'yity."

#### Ayuk yajtuknigéxy ja mubujkputujk jap Esmirnu

<sup>8</sup>Nijay nandu'un yu n'ayuk kajxwa'xpuats di'ibu ijtp ma yu mubujkputujk ñaymyúkudu jam Esmirnu: "Du'un jyuna'añ yu jawyiimba esu tim okpu, di'ibu ok'o'kpu es net jyikypyejky. <sup>9</sup>Uj nnija'abats ko m'ayoodup. Per jotkujkudu mut ko Dios mdsókudu es mbudúkudu. Es nnija'abats ko nugoo mni'ow mniyaaxudu di'ibáty naydyjjudup ko 'yisraelítaty, di'ibu sitay je'eyu ko myujku'umadúndu. <sup>10</sup>Katu mdsu'ugudu mut ko m'ayowa'andu. Yu mujku'ugópku yu'u wyinma'añ myo'oyaampy ja myuduumbuty es mbujta'aga'añaty pujxndugóty miidsuty nidu'ugaty, es waanu tiempu mya'ayowa'añaty muk, es du'un xymyastu'uttat ja mmubujkunaty. Yajti'igyudu mjot mwinma'añaty extu o'kunbyaaty, es ujs miits nmo'oydyup yu jiky'ajtun winu xuu winu tiempu. <sup>11</sup>Di'ibu mudoodup, wa'an tjaygyúkudu di'ibu 'yanmaaydyup ja Espírítu Santu tadu mubujkputy di'ibu naymyujkudup: Pún madakp, kyaj ja'a pyaadudat ja ayo'on di'ibu du'un éxtamu ja'ay 'yooktu myumajtsk ok."

#### Ayuk yajtuknigéxy ja mubujkputujk jap Pérgamu

<sup>12</sup>Nijay nandu'un yu n'ayuk kajxwa'xpuats di'ibu ijtp ma ja mubujkputy ñaymyúkudu jam Pérgamu: "Du'un jyuna'añ di'ibu myudajtypy ja espaadu jajpki'pymbyu es majtsku 'yaa: <sup>13</sup>Uj nnija'abats ko mdsuunudu ma ja Satanás 'yane'emy. Es nan nnija'abats kots miits xypyanyjxtu amumdu'uk jot, es kyajts xymyastu'uttu oy tjaya'o'ktu ja n'ayuk kajxwa'xpu Antipus ma miidsuty, jap ma ja Satanás tsyuun. <sup>14</sup>Per ma miidsuty tam tits nga'oyjya'ap, mut ko tam ñaymyíkyaty mut miidsuty di'ibu pyanajxtup ja Balamu 'yuxpujken. Tadu Balán yu'u wyinma'añmyooy ja Balak wi'ix dyajpekytúnat ja israelítaty, ttuktsu'tstu ja tsu'utsy di'ibu tu yajtukwindsu'ugu ja agojwinnáxaty, es myu'induundu. <sup>15</sup>Njuna'añhdsu du'unu tyaadu mut ko ma miidsuty, ta di'ibu pyanajxtup ja nikoláytydyu 'yuxpujken, mut ko uj nandu'un n'axuk'ijxpyats. <sup>16</sup>Paaty jodumbittu. Pún kudii, nujxuups es nyajkutugóyupstu tadu axuk ja'ayuty mut ja espaadu di'ibu pudsuump madsu n'aa. <sup>17</sup>Di'ibu mudoodup, wa'an tjaygyúkudu di'ibu ja Espírítu Santu 'yanmaaydyup ja mubujkputy di'ibu naymyujkudup: Pún madakp, ndukju'xupts ja ayu'udsyubu manaa. Es nandu'un nmo'oyuups tu'ugu poop tsaa di'ibu myudajtypy kuxja'ay yu xuu jembyu di'ibu ni pún tkanjawu, ja'ayu ñija'ap di'ibats nmeepy."

#### Ayuk yajtuknigéxy ja mubujkputujk jap Tyatiiru

<sup>18</sup>Nijay nandu'un yu n'ayuk kajxwa'xpuats di'ibu ijtp ma ja mubujkputujk ñaymyúkudu jam Tyatiiru: "Du'un jyuna'añ ja Diosu 'yU'unk di'ibu myudajtypy ja wyiin éxtamu junya'angun, esu tyeky du'un éxtam ja bronsu di'ibu jantsy tu'xp: <sup>19</sup>Uj nnija'abats di'ibu mduundup. Nnija'abats ja mdsojkenaty, yu mmubujkenaty, yu mma'xtujkenaty, es wi'ixu Dios xymyudundu. Es nnija'abats ko tyam xytyundu oy waanu ni'igu kudiinam

jawyñur. <sup>20</sup>Per mdugooydyur mut ko xyña'ixtu tadu toxytyujk Jezabel di'ibu nayñigajxur ko yu'u Diosu 'yayuk tkajxwa'xu, per je'eyu 'yanda'aky es twin'uundu ja di'ibuts xymyuduundur, es myu'indúndut es nan tju'xtat ja di'ibu tu yajtukwindsu'ugu agojwinnáxuty. <sup>21</sup>Uj tats njamo'oyu tiempu esxyur yu'u tu jyodambity, esxyur tu dyajtugátsy ja wyinma'añ. Per kyajpu du'un tu ttuna'añ, kyaj tu tmastu'uty ja ma'induunk. <sup>22</sup>Ja'agyujxm ko kyaj tmastu'uty ja pekytyu'unun, ujtsuts nyajka'ap tu'ugu pa'am es 'yayówt muk, nandu'un 'yayówt púnuty mmut pyektyundu pún kyaj tmastu'uttu ja pekytyu'unun. <sup>23</sup>Es nya'oogupts ja Jezabelu 'yu'unguty, es du'un nduknijáwudats nidagekyu mubujkputujkuty kots uj n'ixy'aty ja jyot wyinma'añuty, es nidu'uk nidu'uk miits ndudyúndut o ngumádyut éxtum mbaadudu. <sup>24</sup>Per miidsuty nija'ajuty di'ibu ak'ijttap Tyatiiru di'ibu kyaj tranujxtu tadu axuk xpujkan es ni tkanijáwudu di'ibuty yu'ujuty tyijttap yu Satanasu 'yuxpujkanu ayu'udsyubu, kyaj nnakymyo'oyuty wiinkpu ana'amun, <sup>25</sup>je'eyu ko xkywentu'áttut di'ibu mmudajttap extu kots uj njumbítut. <sup>26</sup>Pún madakp es ttuñ di'ibuts uj ndsejpy, nmo'oyupts uj ja kutujkan es 'yana'amut ma tugekyu ja naxwíñudu, <sup>27</sup>es du'un 'yana'amut éxtum ko ja naxtu'ts yajtukwépy ja pujxndajk, es tyukpu'uju, du'un éxtum nDeedyats tu xymyo'oy esats nyajkutúkat. <sup>28</sup>Nandu'un nmo'oyur ja jayxyu. <sup>29</sup>Di'ibu mudoodur, wa'an tjaygyúkudu di'ibu ja Espiritu Santu 'yanmaadyur ja mubujkputy di'ibu naymyujkudur."

#### Ayuk yajtuknigéxy ja mubujkputujk jap Sardus

**3** <sup>1</sup>Nijay nandu'un yu n'ayuk kajxwa'xpu'ts di'ibu ijtp ma ja mubujkputujk ñaymyúkudu jam Sardus: "Du'un jyuna'añ di'ibu myudajtypy ja jaxtujku madsa'a es ja Diosu Jya'ajun di'ibu tyiimpy jaxtujk naxu tuunk: Uj nnija'abats di'ibu mduundur. Oy miits mjajiky'attu, du'un m'ittu éxtum eekypun. <sup>2</sup>Paaty wijtu es muk tundu ja mjot, mo'oydu muk'ajtan di'ibu akwu'ampnum, di'ibu jawaanu kya'o'knu, ja'a ko tats n'ixy es kyaj tyim'óyuty di'ibu mduundur Dios windum. <sup>3</sup>Jamyatstu ja oybyu n'uxpujkanuts di'ibu m'axaju. Kudyundu es yajtugátstu mwinma'añuty es mjiky'áttut. Pún kyajpu du'un xytyundu, nujxu'ts ti'in, éxtum tu'ugu ma'tspu, ma ni xykya"awíxyudsu naty. <sup>4</sup>Per jap Sardus tap naagudyu ja'ay di'ibuts situy taaym'ts xymyuduundur amumdu'uk jot. Yu'u tyaadaty jyudíttut mut uj poop witxu, mut ko du'un ñitúkudu. <sup>5</sup>Pún madakp, nan ndukpujta'agupts ja poop wit, es kyajtsu xyu njo'tsat ma 'yity kuxja'ay nekykyujxy ja xyuujuty púnuty jiky'ajttap winu xuu winu tiempu. Ni'iguts n'axájut éxtumdsu nja'ajun madsu nDeety 'yity mut ja 'yánklusuty. <sup>6</sup>Di'ibu mudoodur, wa'an tjaygyúkudu di'ibu ja Espiritu Santu 'yanmaadyur ja mubujkputy di'ibu naymyujkudur."

#### Ayuk yajtuknigéxy ja mubujkputujk jap Filadelfyu

<sup>7</sup>Nijay nandu'un ja n'ayuk kajxwa'xpu'ts di'ibu ijtp ma ja mubujkputujk ñaymyúkudu jam Filadelfyu: "Du'un jyuna'añ di'ibu ni madsu pyojpu, di'ibu ja Tuya'ajtan es di'ibu myudajtypy ja rey Davitu 'yawatsn; es ko dya"awa'atsy tii, ni pún mbaat tkaya"adiky; es ko ti dya"adiky, ni pún

mbaat tkaya'awa'atsy. <sup>8</sup>Uj nniija'abuts di'ibu mduundup. Tuts mbujta'aky tu'ugu tujk aa awa'ats ma miidsaty, di'ibu ni pán mbaat tkaya'adiky. Oy nngoo xykyamudajtpu mujaa, tu xykyuydyundu ja n'ayúkuats es kyajts tu xy'uxtijy. <sup>9</sup>Ja mujku'ugópk mduumbuty, tadu andákppty di'ibu nayñigajxudup ko yu'u 'yisraelítaty, per nugoo je'eyu 'yanda'aktu, nyajkoxtánudupts mdeky'ujxy, es du'un tnijáwudut ko tuts uj miits ndsoktu. <sup>10</sup>Tu xykyuydyúnduts ja n'ana'amun ko tu xymyudattu ja ma'xtujkun, es mudu tyaadu ujtsuts mij nguwa'anup ko naty myiñ ja ayo'on di'ibu minaamp ma tugekyu naxwiñudu, es yajtukkumudowa'añ di'ibu jiky'ajttup naxwiñ. <sup>11</sup>Uj múnupts tsojk. Mudattu mwinma'añóty es padunda ja n'uxpukunuts di'ibu tu xy'axájudu, kudiibu pán mbujkudut yu mmay'aty. <sup>12</sup>Pán madakp, nbujta'agupts uj es 'yítut éxtum tu'ugu pilaar madsu nDiosu tyujk. Jap wyu'amut winu xuu winu tiempu. Ni pán tkayajjuga'agut. Nguxja'ayuputs ma ja madákppty ja nDiósudsu xyuu. Es nan nguxja'ayuduts ja nDiósudsu kyajpn xuu, ja jembyu Jerusalén di'ibu kudakp tsajpótm. Es nan nguxja'ayaambyuts yu jembyu nxuuts. <sup>13</sup>Di'ibu mudoodup, wa'an tjaygyúkuudu di'ibu ja Espíritu Santu 'yanmaaydyup ja mbujkpty di'ibu naymyujkudup.”

#### Ayuk yajtuknigéxy ja mbujkputujk jap Laodiseeu

<sup>14</sup>Nijayu nandu'un ja n'ayuk kajxwa'xputts di'ibu ijtp ma ja mbujkputujk ñaymyúkuudu jam Laodiseeu: “Di'ibu du'uñum 'yity éxtum jaayum es di'ibu ñigajxypy es ttuñ ja tny'ajtan, yu'u du'un di'ibu yajtsonu'k yajtsondák tugekyu di'ibu Dios yajkoj, es du'un jyuna'añ: <sup>15</sup>Uj nniija'abuts di'ibu mduundup. Tim tny'ajtan ja'a du'un ko je'eyu mjokx'attu. Ni mgatatsn'attu es ni mga'an'attu. Ndejpyuts es mdatsn'áttut o m'an'áttut. <sup>16</sup>Kom je'eyu mjokx'attu, paaty n'ok'uxtijtu éxtum ja ja'ay ya'uudsuty di'ibu kyaj jyot tkupeky. Mudu tyaadu, ja'ats n'andijpy ko ni xykyadimtsóktats es ni xykyadimtuk'ak'áttuts. Kyajts miits xymyutnaymyaayubu'áttu es ni xykyamudsip'áttuts, es kyajtsu du'ambu ndseky di'ibu du'un. <sup>17</sup>Miits mjúnándup: Mukja'ayudyuts uudsuty, kyajts ti xytyugoy'ajtxudu, extu nani'iguts nmudáttuts. N'anmaaydyupts miidsaty: Dios m'ijxudup éxtum tu'ugu muk ayoobu ja'ayun, es éxtumu niwa'ats uxwa'atspən, es éxtumu wiints. <sup>18</sup>Paaty n'uwijy ngajxwijy esuts xyñimínduduts es xyjúdyut ja wa'ats oorə, es du'un situy mmukja'ay'áttut. Es nandu'un ma ujun min xyjuudyu mwitu pooppə, es mnaywyítxudut, kudiibu m'íttut niwa'ats uxwa'ats. Es nan ma ujun mmínut es xyjúdyut yu mwiindsooy, es du'un mbaat yajxon m'íxtut. <sup>19</sup>N'oodupts es njujwijtsambijttupts nidugekyu di'ibuts ndsejpy. Paaty jodambittu es mut winu mjot xykyuydyúndut di'ibuts miits n'anmaaydyup. <sup>20</sup>Mudowdu, tyáputts tujk agu'uy ngugajxu. Pən pán myudeebyuts ja n'ayuk es dya'awa'adsut ja tyujk aa, tákubuts es n'ítuduts mut yu'u, es ti'igyuts ngáyut. <sup>21</sup>Pán madakp, nya'u'uñupts ti'igyu ma uj, es muut nyajkutúkuudu, du'un éxtumts uj nmamadaky ja pojpu es uñaaybyuts ti'igyu madsu nDeedyuts, es nyajkutíkyuts mut yu'u. <sup>22</sup>Di'ibu mudoodup, wa'an tjaygyúkuudu di'ibu ja Espíritu Santu 'yanmaaydyup ja mbujkpty di'ibu naymyujkudup.”

**Wi'ixu Dios yajwindsu'ugu tsajpótm**

**4** <sup>1</sup>Es óknam n'ijxyuts tu'ugu tujk aa awa'ats tsajpótm. Es xymyugajxyuts jatugok ja di'ibu myudajtypy ja 'yayuk éxtum trompetu, es xy'anmaayuts:

—Ku't ja yam, es nduk'ixut di'ibu koonam tyuna'añ jyata'añuty óknam.

<sup>2</sup>Netyu ja Espiritu Santu xymyunejxyuts tsajpótm. Es jámuts n'ijxy tu'uk 'yu'uñu ma 'yuñaaybyajn. <sup>3</sup>Yu wyiin jyujp tye'xy éxtum ko tye'xy ja oybyu tsaa di'ibu xyu'ajtypy jaspe es kornalinu. Es jamu natyu i'tsy juwudity ma ja 'yuñaaybyajn, es jyantsytye'xy, éxtum tu'ugu tsuxk jajun es éxtum tye'xy ja oybyu tsaa di'ibu xyu'ajtypy esmeraldu. <sup>4</sup>Es n'ijxyuts ma ja uñaaybyajn juwudity i'px majtáxku uñaaybyajn ma 'yu'uñudu es yajkutíky i'px majtáxku mǎjja'aydyujk, ak poobwítxu es mut ja 'yooru koronu kyubajkkujxm.

<sup>5</sup>Esu uñaaybyajn di'ibu itkijky pyudsemy ja anaa júdsuk. Es wyindum tyoy éxtum juxtujku tsinwaty, di'ibu 'yandijpy ja Diosu Jya'ajan di'ibu tyiimpy juxtujk naxu tuunk. <sup>6</sup>Esu uñaaybyajn di'ibu itkijky, nan jam tu'uk éxtum jikymyejyñ, yajtuk'ijxnajxp éxtum viidru. Es windujp uxku'p es pyu'aaybyu'ay 'yity nimajtáxku jiky'ajtpu di'ibu windiky ja ñini'x mut ja wiin. <sup>7</sup>Tu'uk ja jawyimbú kyuxe'eky éxtum kaa, ja myamajtskpu kyuxe'eky éxtum tooru, ja myudugukpu du'un tmudaty éxtum ja'ayu wyiin jyujpñ, es ja myamajtáxkpu kyuxe'eky éxtum witsnun kyaagudíty. <sup>8</sup>Tyadu nimajtáxkpu jiky'ajtpu nidu'uk nidu'uk tmudaty ja kyakn tudujk. Esu kyakn nikujxy kyaknbatku'uy tmudaty ja wiin. Es xuuñ koots du'uñum jyuna'andu:

Nugoo 'yokwa'ats'ajnu yu Nindsun'ajtam Dios,

di'ibu tugekyu muk'ajtan myudajtypy,

di'ibu du'uñum ijt, di'ibu ijt es du'uñum 'yita'añ.

<sup>9</sup>Es tugok tugoku tadu nimajtáxkpu jiky'ajtpu t'awdattu es twindsu'ugudu es tja'aygyuda'aktu di'ibu uñaapy tsunaapy uñaaybyajno'ty ma yajkutíky, es jyiky'aty winu xuu winu tiempu, <sup>10</sup>net ja i'px majtáxkpu mǎjja'aydyujk twingoxtánudu di'ibu uñaapy tsunaapy uñaaybyajno'ty, es t'awdattu di'ibu jiky'ajtp winu xuu winu tiempu, es tpujta'aktu ja kyoronu uñaaybyajn windum, es jyuna'andu:

<sup>11</sup>Nindsun'ajtam Dios,

mijtsu du'un mbátup es xy'axájut

ja mǎj'ajtan, windsu'kun esu muk'ajtan,

mut ko mijtsu du'un tu xyajkojta'ay tugekyu di'ibu ijt,

es mgu'amdsokungyujxm mij xya'ity es xyajkojy.

**Neky di'ibu winjaya windujp uxku'p, es ja Borreegu'unk**

**5** <sup>1</sup>Nétuts n'ijxy ma Diosu 'yaga'añgyu'u tuk pityu neky di'ibu winjaya windujp uxku'p, es juxtujku seyu. <sup>2</sup>Net tu'ugu muk anklus kyajxkéky:

—¿Pún páttup es dyajjanákut ja seyu es dya'awa'adsudu tyadu neky?

<sup>3</sup>Per ni tsajpótm, ni naxwiin es ni nax patku'p kyajáputy pún mbaat dya'awa'adsyu tadu neky, es ni mbaat tka'ixtu. <sup>4</sup>Nétuts uj njantsytyujku jii'byu, ja'a ko kyaju naty pún yajpaaty pún páttup es dya'awa'adsut ja

neky es t'ixut wi'ix jyuna'añ. <sup>5</sup>Net tu'uk ja ni'i'px majtáxkpu mǎjja'aydyujk xy'anmaayuts:

—Katú mǎ'uy. Yu Judaa tyuump 'yaats di'ibu yajtǎj Kaa, di'ibu nandu'un tuump'ajt aats'ajtup ja rey Davit, yu'u tu myada'aky. Yu'u mbaat dya'awa'adsyu tadu nekyptyy es dyajjunákut ja juxtujkpu seyu.

<sup>6</sup>Nétats n'ijxy kujk'am mǎ ja ni'i'px majtáxkpu mǎjja'aydyujk es mǎ ja nimajtáxkpu jiky'ajtpaty di'ibu jittup mǎ Dios yajkutíky wyindum, es n'ijxyuts tu'ugu Borreegu'unk tyanu di'ibu kaxu'kp éxtum tu 'yokwindsu'kun'ajtpu. Es tmudaty yu Borreegu'unk juxtujku wyaj es juxtujku wyiin. Es ja juxtujkpu wyiin, yu'u 'yandijpy ja Diosu Jya'ajun di'ibu tyiimpy juxtujk naxu tuunk es di'ibu Dios tu tkexy mǎ tugekyu naxwíñudu. <sup>7</sup>Tadu Borreegu'unk yu'u oj ñejxy es t'axaju ja neky di'ibu naty ja Dios myudajtypy mǎ ja 'yaga'añgyu'u. <sup>8</sup>Es ko t'axaju ja neky, ja nimajtáxkpu jiky'ajtpaty es ja ni'i'px majtáxkpu mǎjja'aydyujk ñaygyoxtnaaydyáku Borreegu'unk wyindum. Nidu'uk nidu'ugu mǎjja'aydyujk tmudattu arpu esu oorú tsim ujs mada poom, di'ibu 'yandijpy ja Diosu jya'ayudyu kyajxtákan, <sup>9</sup>es t'awdu tyadu jembyu uy:

Mijtsu du'un mbátup es xy'axájut tyadu neky es xyajjunákut ja juxtujkpu seyu.

Paaty mat ko tu mnejxy windsu'kun,

es mat ja mne'pyñ xyjuuy

éxtum ja Diosu jya'ayuty,

pánaty jiky'ajttu mǎ maygyajpn, mǎ wiinkpu may ayuk kajxpaty, es mǎ mayñaxwíñudu.

<sup>10</sup>Tu xyryujta'aktu yajkutujkpaty esu teedyuty, es tmádúndut ja Dios es yajkutúktut naxwiin.

<sup>11</sup>Nétats n'ijxy kanaak miyongu ánkłusaty juwudity mǎ ja i'px majtáxkpu mǎjja'aydyujk, es ja nimajtáxkpu jiky'ajtpaty, es mǎ di'ibu uñaapy tsunaapy uñaaybyajnooty, <sup>12</sup>es jyuna'andu muk:

Yu Borreegu'unk di'ibu tu ñejxy windsu'kun,

pátup winu xuu winu tiempu t'axájut ja kutujkun,

mǎj'ajtun, wijy'ajtun, muk'ajtun,

windsu'kun, oy'ajtun esu awdajtun.

<sup>13</sup>Es nmudooyuts nandu'un nidugekyu di'ibu jiky'ajttup tsajpótm, naxwiin, nax patku'p, es jikymyejyñóty jyuna'andu:

Pátudup ja Dios esu Borreegu'unk

ja awdajtun, windsu'kun, mǎj'ajtun

esu muk'ajtun winu xuu winu tiempu.

<sup>14</sup>Ja nimajtáxkpu jiky'ajtpu jyuna'andu:

—Wa'an du'unaty.

Es ja ni'i'px majtáxkpu mǎjja'aydyujk ñaygyoxtnaaydyákudu es t'awdajttu Dios.

### Juxtujkpu seyu

**6** <sup>1</sup>Nétats n'ijxy ja Borreegu'unk ko dyajjunáky myutu'ukpu seyu mǎ ja juxtujkpu. Es nmudoogajxyuts nidu'ugu nimajtáxkpu jiky'ajtpaty, es jantsy muk kyajxy, éxtum ja anaa ñekyun:

—jMin!

<sup>2</sup>Nétuts n'ijxy tu'ugu poop kwaay, es di'ibu tyuk'uñaapy tmadaty tu'ugu ti'pxn, es tpujtákuda tu'ugu koronu. Ta oj pyudsemy éxtum di'ibu madakp es myada'aga'añ.

<sup>3</sup>Ko ja Borreegu'unk dyajjunajky ja myumajtskpu seyu, nmudoogajxyuts ja myumajtskpu jiky'ajtpu kyajxy:

—jMin!

<sup>4</sup>Es pyudsemy tu'ugu tsapts kwaay. Es di'ibu tyuk'uñaapy yajmooy ja kutujkun es yajtsiptákut ma tugekyu naxwíñudu, es ja ja'ayuty ñayya'oogudat nixim niyam. Es yajmooy tu'ugu muj espaadu.

<sup>5</sup>Ko ja Borreegu'unk dyajjunajky ja myudugukpu seyu, nmudoogajxyuts ja myudugukpu jiky'ajtpu jyuna'añ:

—jMin!

Nétuts n'ijxy pyudsemy tu'ugu yuk kwaay. Es di'ibu tyuk'uñaapy, yu'u myudajtypy tu'ugu balanu. <sup>6</sup>Es nmudooyuts kyajxy kujk'aay ma ja nimajtáxkpu jiky'ajtpu, es jyuna'añ:

—Je'eyu tuk kilu triigu xyákut tuk xuu nidún, es tuguk kilu sebaadu xyákut tuk xuu nidún, per ni je'eyu xykyatónat yu aseytu oliivu es ni yu vinu.

<sup>7</sup>Ko yu Borreegu'unk dyajjunajky ja myumajtáxkpu seyu, nmudoogajxyuts ja myumajtáxkpu jiky'ajtpu jyuna'añ:

—jMin!

<sup>8</sup>Nétuts n'ijxy tu'ugu bayu kwaay. Es di'ibu tyuk'uñaapy, ja'a txu'aty O'kun. Es ux'aay pyamíñaty ja di'ibu ñiwindsun'ajtypy ma ja o'krutajk. Yajmoodyu ja kutujkun es dya'ooktat tuk peky ja di'ibu wa'xp taxk peky ja naxwíñudu ja'ay, dya'oogat mut ja espaadu, yuu, pa'am esu awa'an juyukaty.

<sup>9</sup>Ko ja Borreegu'unk dyajjunajky ja myumugoxkpu seyu, n'ijxyuts artal patku'uy ja 'yanmuja'anaty ja ja'ayuty di'ibu naty tu 'yooktu mut yu'uguyxm ja Diosu 'yayuk di'ibu naty yu'ujaty tu tkajxwa'xtu. <sup>10</sup>Tyaadu kyajxta jantsy muk:

—Nindsun'ajtam Dios, mij situy mmudajtypy tugekyu kutujkun.

Mjantsywy'a'adsaty es mduy'ajtnmudaty. ¿Extu na'anum xypyayo'oya'añ es xytyukkumudowa'añ ja naxwíñudu ja'ayuty mut kots tu xya'ooktu?

<sup>11</sup>Net yajmoodyu nidu'uk nidu'uk pyoop wit, es tyuk'ana'amudu:

—Awixtu mut ja ma'xtujkun jawaandi'knu. Nandu'un éxtum miidsuty oj m'ooktu, tuu dun tyimpatypy ma dun 'yooga'andu ja mmugu'uk di'ibats uj nandu'un nja'ay'ajttap. Yu'u yajka'pxaampy ja jyamyut di'ibáty oogándap mut kots xymyudúñ.

<sup>12</sup>Ko ja Borreegu'unk dyajjunajky ja myududujkpu seyu, nétuts n'ixy ko myiñ ja tugoymuk uix, ja xuu yukudyaay éxtumu yuk wit, yu po'o jyumbijttaay tsapts, du'un éxtumu ne'pyñ, <sup>13</sup>esu madsa'a kya'ay naxkujxy éxtum ja iigu tump kya'ay ma ja kyepy ko myiñ ja muk poj. <sup>14</sup>Du'un ja tsajp ya'ijxtugoooy éxtumu neky ko ya'axaatsy. Tugekyu tun kópkaty esu naxwíñudu di'ibu jikymyejyñóty yajwijtsxijttaaydyu. <sup>15</sup>Net yu naxwíñudu ja'ayuty ja ryey ñayyu'tsudu aangóty es muj kaadsóty, ti'igyu mut ja



mukja'aydyajk, soldaadu wyindsunuty, yajkutujkputy, yajmuduumbuty esu muduumbuty, <sup>16</sup>es t'anuumudu ja tun kopk esu kaats:

—Nijitpajtkats uudsuty es yu'tskuts kudiibuts x'ixut ja di'ibu uñaapy uñaaybyajngujxm, es kudiibuts xypyaadat ja muk tudyu'unun di'ibu yakaampy ja Borreegu'unk, <sup>17</sup>ja'a ko tu net jya'ty ja muj xuu ma ja tudyu'unun 'yita'ān, zes pūn mbaat tmamada'aky?

### Israelitu ja'ayuty di'ibu yajtsaaydyu

**7** <sup>1</sup>Oknūmts n'ijxy nimajtaxku wiinkpu anklus tyānudu, tu'uk ma xuu pyudsemy, jatu'uk ma xuu tsi'ity, jatu'uk ma jumboj myiñ, es jatu'uk ma yukpoj myiñ, es tmajtswu'umdu tugekyu pójuty, kudiibu pyójut ya naxwiiñ ma tugekyu aay kepy, es ni ma jikymyejyñ.

<sup>2</sup>Nétuts n'ijxy jatu'ugu wiinkpu anklus di'ibu miimp ma xuu pyudsemy, mut ja syeyu Dios di'ibu winu xuu winu tiempu ijtp. Tyadu anklus tmayaxykyky ja nimajtaxkpu anklus, ja di'ibu Dios tu tmo'oy ja kutujkun es tudyu'unut ya naxwīnudu esu jikymyejyñ, es 'yanmaayy:

<sup>3</sup>—Katu xytyudyundu ya naxwīnudu esu jikymyejyñ, es ni ya aay kepy. Awixtu extu kots ndsa'ayutnūm wyimbokkujxm nidugekyu ya Nindsun'ajtūm Diosu myuduumba.

<sup>4</sup>Du'un nmudóyuts ko mugo'px jajustyikxymyajtāx mil yajtsaaydyu ja israelitu ja'ayuty, ja nimajmajtsk pekyru ja Israelu tyūmp 'yaats:

<sup>5</sup>nimajmajtsk mil yajwinwijtstū ja Judaa tyūmp 'yaats, nimajmajtsk mil ja Rubengu jya'a, nimajmajtsk mil ja Gaadu jya'a, <sup>6</sup>nimajmajtsk mil ja Aseru jya'a, nimajmajtsk mil ja Neftalii jya'a, nimajmajtsk mil ja Manasesu jya'a, <sup>7</sup>nimajmajtsk mil ja Simeongu jya'a, nimajmajtsk mil ja Levi jya'a, nimajmajtsk mil ja Isakaru jya'a, <sup>8</sup>nimajmajtsk mil ja Zabulongu jya'a, nimajmajtsk mil ja Joseeju jya'a, es nan nimajmajtsk mil ja Benjamingu jya'a.

### Mayjya'ay wyítxuty poop

<sup>9</sup>Oknūmts n'ijxy tūgoomyay ja ja'ay di'ibáty jiky'ajttu ma maygyajpn, ma wiinkpu may ayuk kajxputy, es ma mayñaxwīnudu. Es tamū naty tyānudu uñaaybyajn winduuy ma ja Dios yajkutíky, es Borreegu'unk wyinduuy, es wyítxuty poop, es tmudattu kyū'ujótmū tūxy'āy. <sup>10</sup>Es nidugekyu yaxkaktu muk:

Yu nitsokun myiñ ma ya Nindsun'ajtūm Dios,  
di'ibu uñaapy ma uñaaybyajn ma yajkutíky,  
es nandu'un myiñ ma ya Borreegu'unk.

<sup>11</sup>Nidugekyu áklusuty wu'umdaaydyu tanu juwudity ma ja mujja'aydyajk, es ma ja nimajtaxkpu jiky'ajtputy, es ma ja uñaaybyajn ma Dios yajkutíky. Net ñajyujpudu naxkujxy wyinduuy ma Dios yajkutíky, es t'awdattu Dios, <sup>12</sup>juuna'andu du'un:

¡Wa'an du'unuty!

Yu awdajtūn, muj'ajtūn, wiyj'ajtūn,

ja'aygyudákūn, windsu'kūn, kutujkun esu muk'ajtūn,

wa'an tugekyu tyādu tja'a'áty ya Nindsun'ajtūm Dios winu xuu winu tiempu.

Wa'an du'unuty.

<sup>13</sup>Net nidu'uga mājja'aydyujk xyajtūyuts:

—¿Púnudyu dūnu tyāaduty di'ibu ak poop ja wyit, es maa dūn tsoondū?

<sup>14</sup>Uj n'adsooyuts:

—Windsūn, mij mnija'ap.

Yū'u 'yadsooy:

—Tyāadu du'un di'ibu tu dyajnāxtu ja muk mā'ay tajūn, di'ibu tu dyajwa'atstu es tu dyajpoobu ja wyit mut ja Borreegu'ungu űe'pyū. <sup>15</sup>Paaty 'yittu űnaaybyajn winduuy mā ja Dios yajkutīky, es tmādundū ja Dios xūūñ koots mā tyujk. Es ja Dios yū'u kwentu'atānūdap es 'yītut mā yū'u. <sup>16</sup>Ni na'a kyanaky'ayōwut mut ja yuu es ja tūdsu, es ni ja xūū kyatsa'ayudut, es ni kya'an'oogut, <sup>17</sup>mut ko yū Borreegu'unk di'ibu ijtp űnaaybyajn windum mā Dios yajkutīky, yū'u kywentu'ajttap éxtum ja byorreegu, es dyajnjxut mā myuxy ja nūu di'ibu yajkypy ja jiky'ajtūn. Es ja Dios yajtātsxudut tūgekyu ja wyinnūu.

### Myujxutjukpu seyu

**8** <sup>1</sup>Ko ja Borreegu'unk dyajjunajky ja myujxutjukpu seyu mā ja neky, ta du'ūñ 'yamoondaay tsajpōtm éxtum kujm oorū. <sup>2</sup>Nétats n'ijxyu tadu jxutjukpu anklus di'ibu tūnaaydyup Dios windum. Yū'ujyū yajmoodyu kujktu'uga trompetu. <sup>3</sup>Oknūm myiūñ jatū'uga anklus mut tu'ugu oorū jūūnxijū. Ta tyūnaay artal winduuy. Ta yajmooy mayū poom es yajpoomjōkut es ttukwindsu'ugut mut ja kyajxtākūn di'ibātu Diosū jya'ayūty, mā ja oorū artal di'ibu ijtp űnaaybyajn winduuy mā Dios yajkutīky. <sup>4</sup>Es ja poom jok, ti'igyū mut ja kyajxtākūn di'ibātu ja Diosū jya'ayūty, pyatūkū mā Dios 'yity. <sup>5</sup>Ta ja anklus ttukko'oju ja jūūnxijū mut ja jūmbajk mā ja artal, es tjubijpe'ky naxwiiñ. Net myiūñ ja anaa judsuk esu ujx.

### Jxutjukpu trompetu

<sup>6</sup>Ta ja jxutjukpu anklus űayjyujp'ijxudu es ttukxu'uxa'andū ja trompétuty.

<sup>7</sup>Ta ja myātu'ukpu anklus ttukxuxy ja trompetu. Ta oj myiūñ ja tūtsn, jūnyā'ank tuktūkū mut ja ne'pyūñ, es kya'ay naxwiiñ. Ta tyooy tuk peky ja naxwīñudu di'ibu wā'x tūguk peky, mut nandū'un tuk peky ja aay kepy di'ibu nandū'un wā'x tūguk peky. Es nan tyooy tūgekyū tsuxk mūuy.

<sup>8</sup>Ta ja myūmajtskpu anklus ttukxuxy ja trompetu. Ta yajjubijpe'ky jikymyejyñóty éxtum tu'ugu māj kopk di'ibu winya'amp mut ja jūūn. Tuk peky ja jikymyejyñ di'ibu wā'x tūguk peky jyūmbijty ne'pyūñ. <sup>9</sup>Es tuk peky 'yo'ktū di'ibu wā'x tūguk peky di'ibu naty tsūnaaydyup jikymyejyñóty, es tuk peky tyūgooy ja di'ibu wā'x tūguk peky ja barkū.

<sup>10</sup>Ta ja myūduūgūkpu anklus ttukxuxy ja trompetu. Ta oj kya'ay tu'ugu māj mūdsā'a tsajpōtmudu, jantsy winya'amp kya'ay mā tuk peky ja mājnūu di'ibu wā'x tūguk peky, es mā nūu myuxy. <sup>11</sup>Ja mūdsā'a ja'a txū'ajty Ta'am. Es tuk peky ja nūu di'ibu wā'x tūguk peky jyūmbijty ta'am. May ja ja'ay 'yo'ktū mut yū'ūgyujxmu tadū nūu.

<sup>12</sup>Ta ja myumajtaxkpu anklus ttukxuxy ja trompetu. Ta oj ñaywya'xyuty tuguk peky ja xuu, ja po'o es ja mudsa'ajuty. Net tuk peky ja xuu, ja po'o es ja mudsa'a oj jyambity koots. Paaty xuuñ myukwingoodsu taxk ooru es nandu'un koots myukwingoodsu taxk ooru.

<sup>13</sup>Nétats n'ijxy tu'ugu witsn kyaagudíty tsajwínm. Es nmudooyats ko muk ya'axy, es jyuna'añ:

—¡Ay! ¡Ay! ¡Ay! Puroobu yu naxwíñudu ja'ayuty ko jatugukpu anklus t'aktukxu'uxtut ja trompétuty.

**9** <sup>1</sup>Ta ja myumugoxkpu anklus ttukxuxy ja trompetu. Nétats n'ijxy tu'ugu mudsa'a di'ibu ka'a naxwiiñ. Tadu mudsa'a yajmooy ja kuk jut 'yawatsn. <sup>2</sup>Net ja mudsa'a dya'awatsy ja kuk jut, es jap jyantsyruudseemy ja jok éxtum ma tu'ugu muj jorna. Esu tadu jok yu'u yajwingoodsu ja xuu, es kyoodsudyaay tugekyu ja tsajwínmadu it. <sup>3</sup>Es ma tadu jok pyudsuumdu mu'u es ñaywya'xtaayudu naxwiiñ. Esu tadu mu'u yajtuk'ana'amdu es ttúput ja ja'ayuty éxtum 'yadu'utstu jaybyu'uk, <sup>4</sup>yajtuk'ane'emy es kudiibu dyajwindugóyut ja aay ujts, ni ja mūy es ni ja kepy, yu'uy je'eyu tyúrur ja ja'ayuty di'ibu kyaj yajtsaaydyu wyimbokkujxy mut ja Diosu syeyu. <sup>5</sup>Per kyaj yajtuknipejky es dya'oogut, je'eyu dya'ayówut mugoxk po'o. Ko tyipy, du'un myúkaty éxtum ko ja ja'ayuty tyúrudu jaybyu'uk. <sup>6</sup>Ma tadu tiempu ja'ayuty jyantsyja'oogándu, per kyaj mbaat ni wi'ix tsoo.

<sup>7</sup>Ja mu'ujaty du'un kyuxu'uktu éxtumu kwaay di'ibu tu ja'ay twu'unda'ay es dyajnjxa'añ tsiptuumbu. Yu kyubajk nandu'un kyuxe'eky tmudaty éxtumu ooru koronu, esu wyiin jyujp du'un éxtumu ja'ayun.

<sup>8</sup>Es yu wyaay du'un tmudaty éxtumu toxytyujku wyaay, esu tyuts du'un éxtumu kaadúts. <sup>9</sup>Yu ñini'x du'un jyuunaty éxtum tmudaty puixn. Es ko kyaagudíty, yu kyakn du'un jyuna'añ éxtum ko yu maygyarru 'yamu'uy ko ñajxtu tsiptuumbu. <sup>10</sup>Yu pyi'ixy du'un éxtumu jaybyu'uk mut ja tyujpn, es mut yu'u dya'ayoy ja ja'ay mugoxk po'o. <sup>11</sup>Tadu mu'u tmudattu tu'ugu wyindsán, es yu'u du'un ja ka'oybyu anklus di'ibu windsun'ajtp ma ja kuk jut. Tyadu ka'oybyu anklus txu'aty ebreeu ayuk Abadonk es grieegu ayuk Apolyonk, di'ibu 'yandijpy yajkutugeebyu.

<sup>12</sup>Tu ñaxy tu'uk ja muk ayo'on, per tugoy'ajtp jamajtsk.

<sup>13</sup>Ta ja myududujkpu anklus ttukxuxy ja trompetu. Nétats nmudooy éxtum pún kyajxy ma ja ooru artal di'ibu ijtp Dios windum, <sup>14</sup>es t'anuumu ja myududujkpu anklus:

—Mugaju tadu nimajtaxkpu anklus di'ibu ijtp tsimy Eufrates mujnub'aay.

<sup>15</sup>Es du'un oj yajnasmásudu tadu nimajtaxkpu anklus di'ibu naty tu yajjajp'ixy ma tadu ooru, xuu, po'o esu jumajt, es dya'oogut tuk peky ja ja'ayuty di'ibu wa'x tuguk peky. <sup>16</sup>Es nmudooyats nu'un ñiwínuty ja soldaadu kwaagyuyjxyruuty, ja'a nidugékyuty majtsk mugopx miyonk.

<sup>17</sup>Es n'ijxyuts iixma'tunguyjxm ja di'ibu tyuk'uñaaydyur ja kwaay tmudattu kyaatsykyujxy ak puixn, tuguk kolor: tsapts, azul es pu'ts. Es ja kwaayuty tmudattu kyubajk éxtumu kaa, es ma 'yaa pyudsemy ja junya'ank, jok esu azufrú. <sup>18</sup>Ja tuk pekyru ja'ayuty di'ibu wa'x tuguk peky 'yo'ktaaydyu mudu tadu junya'ank, jok esu azufrú, di'ibu pudsuum ma tadu

kwaayü 'yaa. <sup>19</sup>Mut ko tadu kwaayü myuk'ajtün tmudaty ma yu 'yaa es ma yu pyi'ixy. Pes yu pyi'ixyaty du'un kyuxe'eky éxtamu awa'andsa'añ mudu kyubajk. Es yu'u mut dyajtsayúty ja ja'ayuty.

<sup>20</sup>Per di'ibu akwu'umdu ja ja'ayuty di'ibu kyaj 'yo'ktu mudu tadu ayo'on, nan kyaj tmastuttu es t'awdátut ja ka'oybyu es nandu'un ja agojwinnax di'ibu oorü, platu, bronsu, tsaa, kepy, di'ibu ni na'a mbaat kya'ixy es kyamudoy, es ni na'a mbaat kyayo'oy. <sup>21</sup>Esu tadu ja'ayuty ni je'eyu tkamastuttu ja brujü'ajtün, mü'induunk esu ma'tsk.

### Anklus mut tu'ugu nekyppyity

**10** <sup>1</sup>Oknum n'ijxyuts jatu'ugu muk anklus di'ibu kudakp tsajpótm, abity mut ja yoots. Es kyubajkkujxy tmudaty ja i'tsy. Yu wyiin jyujp jyantsytye'xy éxtamu xuu, esu tyeky du'un kyuxe'eky éxtam majtsku pilaar di'ibu winya'amp. <sup>2</sup>Es kyü'ujóty tmudaty tu'ugu nekyppyity. Es trujtáky ja 'yaga'añdyéky ma yu jikymyejyñ, esu 'yanajñdyéky trujtáky ma naxwíñadu. <sup>3</sup>Net kyajxkéky muk éxtam tu'ugu kaa myu'uy. Es ko du'un yaxkeky, ta ja juxtujkpu anaa kyajxtu. <sup>4</sup>Nétats uj njaja'ayañ éxtam ja anaa jyñañ. Per tats nmudooy xymyugajxyuts tsajpótm, es xy'anmumuts:

—Katü xykyuxja'ay di'ibu ja anaa tu tkajxy. Mudat ayu'udsyu mjodoty mwínma'añóty.

<sup>5</sup>Nétats n'ijxy ja anklus di'ibu naty tu ñaxwa'aky ma ja jikymyejyñ es ma ja nax, es tkone'ky ja 'yaga'añgyu'u, <sup>6</sup>es jyñañ:

—Dios di'ibu jiky'ajtp winu xuu winu tiempu, es yajkoj ja tsajp, naxwíñadu, jikymyejyñ, es tugekyu di'ibu jaa'ajtp ma yu'u, yu'uts ndestiigu'ajtypyuts ko tuj'ajtün yu'u di'ibu tyam n'anmaaydyur. Dios kyaj ñakyjyaka'añ ma tkuydyuna'añ ja di'ibu wyandak. <sup>7</sup>Per ko ja myujxxtujkpu anklus ttukxu'uxa'añ ja trompetu, tu naty tyuñ jyátyuty di'ibu Dios kyaj dyajnija'aju ma ja ja'ayuty, éxtam jékyur t'awa'anudu ja myuduumbuty, ja kyugajxputy.

<sup>8</sup>Net di'ibadsu naty tu xy'okmugajxpu tsajpótm, jatugok xymyugajxyuts, es xy'anmaayuts:

—Nujx axaju tadu nekyppyity di'ibu myudajtypy ja anklus kyü'ujóty.

<sup>9</sup>Nétats nninejxy ja anklus, es n'amdooyuts esuts xymo'oyut ja nekyppyity. Tats ja'a xy'adsooy:

—Tyaa, mats, ju'x. Ma m'aa xyjáwut pa'ak éxtamu seeru pa'ak, per mjodoty jyumbítut ta'am.

<sup>10</sup>Nétats n'axaju ja nekyppyity, es oj nje'xyuts. Es n'aaajótyuts nja'aju pa'ak éxtamu seeru pa'ak, per kots nju'xtaay, net jyumbijty ta'am njodótyuts.

<sup>11</sup>Nétats xy'anmaay:

—Mgajxwa'xur ja Diosu 'yayuk jatugok di'ibu pátur púnuty jiky'ajttur ma maygyajpn, ma mayñaxwíñadu, ma wiinkpu may ayuk kajxputy, es ma mayryéyuty.

**11** <sup>1</sup>Nétats xymooydyu tu'ugu tsajkápyñ di'ibu du'un éxtamu kijxn, es xy'anmaaydyuts:

—Nujx es xykyijxut ja Diosu tsyajptujk esu 'yartal, es madsyow naak jap di'ibu Dios awdajttur. <sup>2</sup>Per katü xykyijxy ja tsajptujk tuj'a, mut ko

tá yajkuyáky müt ja naxwíñudu di'ibü kyaj 'yisraelítuty. Es yu'ujuty tyuktaanán tyukwa'agándup justyikxymyajtsk po'o ja Jerusalén kajpn. <sup>3</sup>Esuts uj ngáxup majtskü ndestiiguts, u'xpu wítxu, es yu'adsu n'ayuk kyajxwa'xup majmajtsk mugo'px jatugü'px xuu.

<sup>4</sup>Tyadu majtskpu testiigu yu'u du'un ja majtskpu oliivus kepy es ja majtskpu kandaleeru di'ibü ijtp Dios windum. <sup>5</sup>Pün ja pün tyuna'anudu axuuk, yu'ujuty yajpudsúmdup ja júnya'ank má 'yaa, es tno'kta'ayut nidugekyu ja myudsip. Esu du'un 'yooktat oytyim púnuty di'ibü tunánup axuuk. <sup>6</sup>Tyadu testiiguty myudajttup ja muk'ajtun es dya"adúkut ja tsajp küdiibu tyu'ujut ja tiempu má tkajxwa'xudu ja Diosu 'yayuk. Es nan myudajttup ja muk'ajtun esu nuu dyajjumbítut ne'pyñ, es dya"ayówdut ja naxwíñudu ja'ayuty müt kanaak naxu ayo'on naak ok yu'u tsoktu. <sup>7</sup>Per ko naty tá tkajxwa'xta'aydyu ja Diosu 'yayuk, net ja axuk júyujk di'ibü pudsümp má ja kuk jut tmüttsiptuna'añ yu nimajtskü testiiguty, esu axuk júyujk myada'aga'añ es ya'oogudut, <sup>8</sup>es ja ñini'x wuy'amut tu'ugijky má tadu kajpn má kyruuzpejty ja Nindsun'ajtam. Es müt ko yu kugajpnuty jyantsymyujpöjpa'ay'áttu, yajxuujejky Sodomu es nandu'un Ejiptu. <sup>9</sup>Es tuguk xuu jakujm t'íxtut ja ja'ay púnuty jiky'ajttup má maygyajpn, má may ayuk kajxputy, es má mayñaxwíñudu, es kyaj ñigutíkyuty dyajnaxtúkudu tadu o'kputy. <sup>10</sup>Nidugekyu naxwíñudu ja'ay xyondakta'ayut müt yu'ugyujxmu 'yo'kun, es jyantsyñayjyáwudut jotkujk, extu naydyuknigáxudup ja may'aty nixim niyam müt ko tadu majtskpu Diosu kyugajxpu tá jyantsyya"ayóyuty. <sup>11</sup>Per ko ñajxy tuguk xuu jakujm, Dios yajjikypuyjk es dyajpude'ky jatugok. Es nidugekyu di'ibáty iixudu jyantsyñay'adsu'kudyaayudu. <sup>12</sup>Net majtsk ja testiiguty tmudoodu kyajxy muk tsajpótm, es jyana'añ:

—;Ku'ttu yam!

Ta pyatujkudu tsajpótm yoodsóty, es yu myudsíputy 'yijxudu. <sup>13</sup>Netyu myiñ ja muk ujx, es tyugooy tuk peky ja kajpn di'ibü wa'x majk peky. Es juxtujk mil ja ja'ayuty 'yo'ktu müt ja ujx. Es nu'un ja ja'ayuty 'yaknadujku müt ja tsu'ugü t'awdajttu ja Dios.

<sup>14</sup>Du'un jyajty ja myumajtsk ok nibudu'uk ja ayo'on. Per tim tsojk myina'añ ja myudugukpu.

### Myujxutjukpu trompetu yajtukxu'uxy

<sup>15</sup>Ja myujxutjukpu anklus ttukxuxy ja trompetu. Net yajmudooy kajxy muk tsajpótm, es jyana'añ:

Tyamü netu Nindsun'ajtam Dios esu Kyrístu  
tá dyajkutujksooná'andu naxwiiñ,  
es yajkutuka'añ winu xuu winu tiempu.

<sup>16</sup>Net ja ni'l'px majtáxkpu müjja'aydyujk di'ibü naty uñaaydyup uñaaybyajnóty Dios windum, ñayjyujpudu es t'awdajttu Dios, <sup>17</sup>es jyana'andu:

Windsún Dios di'ibü tugekyu muk'ajtun mmudajtypy,  
mijtsu du'un m'ijjt, es mijts du'un m'ijtp.  
Nja'aygyudákyputyats mij ko tá xyajtsonda'aky myajkutíky.

<sup>18</sup> Yu naxwíñadu ja'ayuty ajkadup mut mij.

Per tu jya'ty ja xuu ma mij xytyukkumadówat.

Es nandu'un tu net tpaaty

ma ja o'kraty xypyayo'oya'anda

es xyajjumbita'an oy ja mmaduumbuty

di'ibu tu m'ayuk tkajxwa'xtu,

es nidugekyu mja'ayuty, maj mutsk,

di'ibu mij m'awdajtudup,

es tu net tpaaty ma mij xyajtugoya'an ja di'ibaty yajma'ttup ja naxwíñadu.

<sup>19</sup> Net 'yawatsy ja Diosu tsyajptujk di'ibu tsajpótm, es kyuxe'ky tsajptugóty ja kaaxu ma 'yity ja kajxy'átypyu di'ibu Dios tyuun mudu jya'ay. Ta myiñ ja muk uix, ana judsúkaty esu muk tutsnduu.

### Toxytyujk esu sarpyentu

**12** <sup>1</sup> Es net kyuxe'ky tsajpótm tu'ugu maj ijxwu'umun: tu'ugu toxytyujk mut ja wyit éxtumu xuu tye'xy, es tyekyryatku'uy du'un kyuxe'eky éxtumu po'o, es kyubajkkujxm tmudaty ja koronu mut majmajtsku madsa'a. <sup>2</sup> Tyadu toxytyujk u'unkmudu naty, es ya'axy mut ja pujkun, ja'a ko ayoop mut ko dyajja'ta'an ja maxu'unk. <sup>3</sup> Net kyuxe'ky tsajpótm jatu'ugu maj ijxwu'umun: tu'ugu sarpyentu di'ibu maj es tsapts, es juxtujku kyubajk es majku wyaj, es mut ja koronu ma tu'uk tu'ugu kyubajk. <sup>4</sup> Yu pyi'ixy ttukpajudojte'ky tuk peky ja madsa'a di'ibu wa'x tugak peky. Ta tkujubijpnajxy naxwiñ. Tyadu sarpyentu wya'kwu'umun ma ja toxytyujk di'ibu naty yajja'taampy ja maxu'unk, es tjuna'an ja maxu'unk jantsy netyu ko jya'tut. <sup>5</sup> Ja toxytyujk dyajjajty tu'ugu u'ungu'unk yedyujk di'ibu yajkutukaamp mut ja pyujndajk ma tugekyu naxwíñadu. Net ja 'yu'unk yajpujku es yajmunejxy ma Dios es ja uñaaybyajn ma yajkutíky. <sup>6</sup> Es ja toxytyujk oj kyaknu ma maj it, ma naty ja Dios tu tyuknibujtaagaty tu'ugu lugaar. Es jap yajmo'oyut ja kya'ay 'yukun majmajtsk mugopx jatugupx xuu.

<sup>7</sup> Net ja tsip tyuun tsajpótm: ja Migel es ja 'yanklus tsiptuundu mut ja sarpyentu es mut ja sarpyentu 'yanklus. <sup>8</sup> Per kyajyem myadaktu ja sarpyentu esu 'yanklus, kyaj ñakyyajna'ijxy ja sarpyentu esu 'yánklusaty 'yítut tsajpótm. <sup>9</sup> Du'un oj yajkujubijpnáxyu tadu sarpyentu, di'ibu 'yandijpy majku'ugópk es Satanás, di'ibu wyin'i'impny nidugekyu ja naxwíñadu ja'ay. Ta naxwiñ yajkujubijpnajx mut ja 'yánklusaty.

<sup>10</sup> Nétats nmadooy kajxy muk tsajpótm, es jyuna'an:

—Tu jya'ty ja Diosu ñitsokun, myuk'ajtun esu kyutujkun. Nan ana'amnubu net ja Diosu Kyristu, es tu yajkujubijpnáxy tsajpótm ja di'ibu ñi'u'unup ja nmugu'uk'ajtam. Xuan koots tmu'uuñ Nindsun'ajtam Dios. <sup>11</sup> Yu nmugu'uk'ajtam tu tmamada'aktu mut yu'ugyujxmu Borreegu'ungu ñe'pyñ, mut ja 'yayuk es mut ja tyu'ajtun di'ibu tu yajkajxwa'xy. Pes kyaj t'ajjptsu'kadu 'yo'kun, ni'igu tmudundu Dios oytyim'ooktat. <sup>12</sup> Paaty xonda'aktu miidsaty di'ibu ijtup tsajpótm. Per purooba miidsaty di'ibu jiky'ajttup naxwiñ es jikymyejyñóty, mut ko ja majku'ugópk tu mnijunákudu awa'an es ñija'ap ko tyimpatyryu du'un ja tiempu.

<sup>13</sup>Ko ja sarpyentü naty tü yajkujubijpnáxy naxwiiñ, ta tjaya'ayowáñ ja toxytyujk di'ibu naty tü tpaaty ja maxu'unk. <sup>14</sup>Per ja toxytyujk yajmooy majtsku kyakn éxtam tu'ugu muj witsnu jya'a, es mbaat kyaagudíty ma ja muj it. Jap wyu'umut tuguk jumujt jakujm, es yajmo'oyut ja kya'ay 'yukan, es kudiibu mbaat wilix 'yada'utsy ja sarpyentü. <sup>15</sup>Ja sarpyentü t'u'tsy ja nuu, es oj dyajmujnuugooy es jy'u'udut ja toxytyujk. <sup>16</sup>Per yu naxwíñudu pyudujku ja toxytyujk, awats ja naxwíñudu es t'uktaay ja majnuu di'ibu naty ja sarpyentü tü t'uutsy. <sup>17</sup>Es mudu taadu ja sarpyentü ttukjot'ambejky ja toxytyujk. Ta oj ñejxy tsiptuumbu mut ja toxytyujku tyuump 'yaats di'ibu akwu'amdup, ja'a njuna'anum di'ibu pyaduundup ja Diosu 'yana'amun es tranujxtu ja Jesukristu 'yuxpujkan. Es ja sarpyentü tyunaay pu'ujótm jikym yejñbyu'aay.

### Nimajtskpu axuk juyujk

**13** <sup>1</sup>Esuts n'ijxy jikymyejyñóty pyudsemy tu'ugu axuk juyujk di'ibu myudajtypy juxtujku kyubajk es majku wyaj. Es tu'uk tu'ugu wyaj tmudaty ja koronu. Es ma yu kyubajkuty tmudaty tu'uk tu'uk kuxja'ay ja xuyujty di'ibu Dios myudageepy. <sup>2</sup>Tyadu axuk juyujk di'ibuts n'ijx, du'un kyaxe'ky ja ñini'x éxtamu kuxyubyujy, esu tyeky éxtamu osu, esu 'yaa éxtamu kaa. Yu sarpyentü yu'u mooyu ja myuk'ajtun esu kyutujkan es 'yana'amut. <sup>3</sup>Nidu'uguty ja axuk juyujku kyubajk, du'un éxtam jyawu tmudajty tu'ugu muj tsayut di'ibu ya'oogudup. Per ja tsayut oj 'yagada'aky. Es ja naxwíñudu ja'ayuty du'uñu jyantsywyu'umudyaadyu es tranujxtu ja axuk juyujk. <sup>4</sup>Es nidugekyu ja'ay t'awdajttu ja sarpyentü mut ko tü tmo'oy ja kyutujkan ja axuk juyujk. Es t'awdajttu nandu'un ja axuk juyujk, jyuna'andu:

—¿Pánu du'un éxtamu tyadu axuk juyujk?, ¿es pánu mbaat maut tsiptúñ?

<sup>5</sup>Es ja sarpyentü yajmooy ja tu'u es ñaymyujpajta'agudut esu Dios tmugajxtugóyut. Nandu'un yajmooy ja tu'u es 'yana'amut justyikxymyajtsk po'o. <sup>6</sup>Es du'un tmugajxtugooy ja Dios es twin'ubat twingajxpátu ma tsyuuñu es di'ibáty ijttup tsajpótm. <sup>7</sup>Nandu'un yajmooy es tsiptúnut mut ja Diosu jya'ayuty, extu tmamadaktü, es yajmooy ja kutujkan ma tugekyu kajpnuty, ma tugekyu ayuk kajxputy, es ma tugekyu naxwíñudu. <sup>8</sup>Es nidugekyu ja'ayuty t'awdajtta'ayudu tadu axuk juyujk, ja'a njuna'anum ja di'ibáty kyajpu xuu 'yity kuxja'ay ma ja ñeky ja Borreegu'unk di'ibu Dios yajk windsu'kun. Esu tadu neky tmudaty kuxja'ay extu ma naty kyajnumu naxwíñudu kyojy, ja xuu nidugekyu di'ibáty myudajttup ja jiky'ajtun winu xuu winu tiempu.

<sup>9</sup>Di'ibu mudoodup, wa'an tjaygyúku. <sup>10</sup>Di'ibu yajmunujxándup tsimy, tsimy yajmunujxtut, es di'ibu oogándup mudu espaadu, mudu espaadu 'yooktat. Paaty pánty ijttup ja Diosu jya'ay, wa'an muk aa muk jot dyajnáxtu pún ti ayo'on tukkadákup, es du'uñum tmabúktut ja Dios.

<sup>11</sup>Oknams n'ijxy pyudsemy naaxóty jatu'ugu axuk juyujk, tmudaty majtsku wyaj éxtam ja borreegu, es du'un jyuna'añ éxtamu sarpyentü, <sup>12</sup>es tmudaty tugekyu kyutujkan ja jawyiimbu axuk juyujk, es yu'u tmadúñ. Es du'un

ttuñ esu naxwíñadu ja'ayuty 'yawdátudut ja jawyiimbu axuk júyujk di'ibu yajtsók ja mäj tsayut. <sup>13</sup>Nandu'un ttuñ ja ijsxw'a'mun di'ibu myudajtypy ja mäj'ajtun, extu yajkudákypy ja júnya'ank tsajpótm ja'ay wyinduuy, <sup>14</sup>es du'un twin'uuñ ja naxwíñadu ja'ayuty müt ja mäj'ajtun di'ibu ja jawyiimbu axuk júyujk tuktuunap. Es yajtuk'ane'emy es dyajnikojtu'uttat tu'ugu awinnax es twindsu'ugudut ja jawyiimbu axuk júyujk di'ibu jyayajtsayujt madu espaadu es 'yakjiky'ajty. <sup>15</sup>Es ja myamajtskpu axuk júyujk yajmooy ja kutujkun es tmo'oyut ja jyiky'ajtuna tadu awinnax es dyajkajxut, es extu dya'oogut di'ibáty kyaj 'yawdátuty. <sup>16</sup>Esu tadu myamajtskpu axuk júyujk tyukkuwa'anu es nidugekyu mäj mutsk, mäkja'ay esu ayooobu ja'ayuty, maduumbuty esu yajmaduumbuty, yajtsa'ayut ma 'yaga'añgyu'u o ma wyimbok. <sup>17</sup>Es du'un ni pán mbaat kyajuy kyategyuty pün kyaj tmudaty ja seyü, ja'a njuna'anum pün kyaj tsa'ayuty müt ja xuu o ja ñumbru ja jawyiimbu axuk júyujk. <sup>18</sup>Tyaadu yu'u tsojkup ja jaygyujkun. Es di'ibáty kuwijy mbaat tnijawudu di'ibu 'yandijpy yu ñumbru tadu axuk júyujk, müt ko yu ñumbru ja'a 'yandijpy ja xuu tu'ugu yedyujk. Yu ñumbru ja'a tudujk mugo'px jatugu'px tudujk.

#### Mugo'px jajustyikxymyajtáxk mil ja'ayuty di'ibu uadup

**14** <sup>1</sup>Oknams n'ijxy ja Borreegu'unk ko naty jam tyanu ma Syon Kopt. Jamu naty muut mugo'px jajustyikxymyajtáxk mil ja ja'ayuty di'ibu naty tsa'ay wyimbokkujxy müt ja syeyu ja Borreegu'unk esu Dios Teety. <sup>2</sup>Es nmudooyats tsajwínm jyuna'añ éxtamu nuadax 'yuutsy pyumimy, es éxtamu anaa muk ya'axy, du'un éxtamu may arpu koobu kyowdu. <sup>3</sup>Es t'awdu jembyu uy uñaaybyajn winduuy ma Dios yajkutíky es ma nimajtáxkpu jiky'ajtputy es ma ja mäjja'aydyujk. Ni pán mbaat tkajatyu tadu uy, ja'ayu je'eyu tadu mugo'px jajustyikxymyajtáxk mil di'ibu oj ñitso'oktu naxwíñ. <sup>4</sup>Yu'u du'unuty di'ibu tsuj yajxon tu jya'ay'áttu, di'ibu nayyajwa'ats'ajtudup éxtamu kixyudo'oxyuty, es tranujxtu ja Borreegu'unk oytym maaty ñejxy. Yu'u du'unuty oj ñitso'oktu ma naxwíñadu ja'ay es ijttup éxtam ja tuump di'ibu jawyiin tuump'ajtp es yajtukmuyóxy ja Dios esu Borreegu'unk. <sup>5</sup>Ni na'a oj kya'anda'áktu, ja'a ko wa'ats ja'ayuty yu'u.

#### Di'ibu kyajxtup ja niduguukpu anklus

<sup>6</sup>Nétats n'ijxy jatu'ugu anklus kyaagudíty tsajpótm, es tmudaty ja oybyu ayuk di'ibu winu xuu winu tiempo wu'ump, es yajkajxwa'xut ma tugekyu nax kajpn, ma tugekyu naxwíñadu, es ma tugekyu wiinkpu ayuk kajxpu. <sup>7</sup>Es jyuna'añ jantsy muk:

—Windsu'ugudu Dios es awdattu, müt ko tu net jya'ty ja oorü ma net trayo'oya'añ ja naxwíñadu ja'ayuty. Awdattu di'ibu yajkoj ja tsajp, naxwíñadu, jikymyeyñ, es ma nuu myuxy.

<sup>8</sup>Es ja myamajtskpu anklus tpanejxy ja jawyiimbu anklus, es jyuna'añ:

—Tu net, tu net jyjitta'ay ja Babiloñu mäj kajpn di'ibu nidugekyu naxwíñadu ja'ayuty tu dyajtugóy müt ja 'yaxuk tu'unun, éxtam ko pán dyajmi'igyuty ja myuguluk.

<sup>9</sup>Es ja myaduguukpu anklus tpanejxy ja jawyiimbu nimajtsk, es jyuna'añ muk:



—Pun ja pún t'awdatyu tadu axuk juyujk, es pún nayyajkup yajtsa'ayut wyimbokkujxy o ma kyua, <sup>10</sup>Dios jantsy tukkumadowudup muk ma ja lugaar mada azufra junya'ank di'ibu yajtukjuj'ijxp, ma 'yayowdut Diosu 'yanklus wyinduuy es Borreegu'unk wyinduuy. <sup>11</sup>Ja juun di'ibu tsal'ayudup, ja'a yajpudu'ugup ja jok winu xuu winu tiempu. Ja'a njuna'anum ko yajtukmadowa'añ winu xuu winu tiempu nidugekyu di'ibaty 'yawdajttup ja axuk juyujk, o ja 'yawinnax, o ko tu yajtsa'aydyu mut ja syeyu. <sup>12</sup>Wa'an yu'u dyajjotkujku ja Diosu jya'ay es tmudanudut ma'xtujkun maut oytyim ti ay'onoty, ja'a di'ibu kyuyduundup ja Diosu 'yana'amun es oy tmundudu ja Jesús.

<sup>13</sup>Nétats nmadooy tsajpótm, es xy'anmaayuts:

—Kuxja'ayu tyadu: “Jotkujk di'ibu tyam o'ktup es di'ibu óknun oogaamp ja'agyujxm ko tmubaktu ja Nindsun'ajtum.” Ja Espírítu Santu du'un jyuna'añ: “Tay'ajtun ko yu'ujty jyotkujkuty, mut ko jabaadu du'un myak'ayoy es tyuñ. Dios mo'oyudup ja pyo'xtákn es myay'ata'añty mut ko oy tu tmadún naxwiñ.”

### Ja'ay yajpayo'oydyu

<sup>14</sup>Nétats n'ijxy tu'ugu poop nima'a. Jam 'yu'uñu ma tadu nima'a kyaxe'eky éxtum ja Naxwíñudu Ja'ayudyu Kyudunaabyu. Jam tmudaty kyubajkkujxm tu'ugu ooru koronu, es tkukápyaty tu'ugu mnydsuyjkn jantsy jujp. <sup>15</sup>Ta pyudseemy tsajptugóty jatu'ugu anklus, es muk tmugajxy di'ibu uñaapy nima'agujxm:

—Tu net tpaaty ja ooru. Yajpudu'uk ja mbujta'aky mada tadu mnydsuyjkn, mut ko tu tsya'amy ja naxwíñudu pyujta'aky.

<sup>16</sup>Ta ja di'ibu naty uñaapy nima'agujxm, ttsujkmijky ja naxwíñudu pyujta'aky.

<sup>17</sup>Ta pyudseemy jatu'ugu anklus ma ja tsajptujk tsajpótm, tmnejxy nandu'un tu'ugu mnydsuyjkn jantsy jujp. <sup>18</sup>Ta pyudseemy jatu'ugu anklus ma ja artal di'ibu jam kywentu'ajtypy ja juun, es muk dyaxu ja di'ibu myudajtypy ja mnydsuyjkn jujppu, es t'anuumu:

—Mut ja mnydsuyjkn tsujkmúk ja naxwíñudu 'yuuvu, mut ko tu tsya'amy.

<sup>19</sup>Ta ja anklus dyajmijky ja uuvu ma ja naxwíñudu. Ta tniko'obejty es twinma'adsa'añ. Ja'a tyadu 'yandijpy ja muk tsaatsytyu'unun di'ibu Dios yakaampy. <sup>20</sup>Ja uuvu oj yajwinma'atsy kajpnbu'aaay. Es ma ya'amatsu pyudseemy ja ne'pyñ tuk metru jakujm kyujxmuty es pyue'ky tuguk mugo'px mil metrun.

### Anklusuty mut ja juxtujkpu ayo'on

**15** <sup>1</sup>N'ijxyuts tsajpótm jatu'ugu muj ijxwu'umun di'ibu ja'ay du'añu yajwe'empy. N'ijxyuts juxtujku anklus mut juxtujku óknumbu ayo'on. Es mada tadu juxtujkpu ayo'on kyujxta'ay ja Diosu 'yajkun.

<sup>2</sup>N'ijxyuts nandu'un éxtum kyaxe'eky tu'ugu jikymyejyñ, éxtumu viidru tuktuku mut ja junya'ank. Es n'ijxyuts nandu'un ja di'ibu myumadaktu ja axuk juyujk mut ko kyaj t'awdajttu ja 'yawinnax es kyaj tkupajktu ja syeyu.

Tamu naty yu'ujuty tyánudu jikymyejyngyujxm, es tmudaty ja 'yarpu di'ibu natyu Dios tu myo'oyudu, <sup>3</sup>es t'awdu ja Moisesu 'yuy, ja Diosu myuduumbu, es ja Borreegu'ungu 'yuy. Esu du'un 'yawdu:

Windsún Dios di'ibu tugekyu muk'ajtun myudajtypy, jyantsymyújuty es jyantsy'oy jyantsytsyújuty di'ibu mdiimpy.

Mij myajkutujkp mada táy'ajtun,

mij myajkutijkyu nidugekyu naxwíñudu ja'ay.

<sup>4</sup>Nindsun'ajtum, ¿pún mgawindsu'ugudup, pún mga'awdátudup?

Mut ko mijtsu dun je'eyu di'ibu wá'ats,

paaty nidugekyu naxwíñudu ja'ayu myíndut

ma mij es m'awdátudut,

mut ko tu t'ixtu ko táy'ajtun tugekyu di'ibu mij mdiimpy.

<sup>5</sup>Oknumts n'ijxy jam tsajpótm 'yawá'atsy ja tsajptujk, ja Diosu tyujk.

<sup>6</sup>Jap tsajptugóty pyudsuumdu tadu juxtujkpu anklus di'ibu myuejxypy ja juxtujkpu ayo'on, es wá'ats poop ja wyit es jyantsytye'xy, es tmudaty ja 'yoora kaatsywyun di'ibu muj ja 'yok.

<sup>7</sup>Net nidu'ugu nimajtaxkpu jiky'ajtpaty di'ibu ijttup Dios windum, yu'u myooyu kujktu'ugu anklus oora tsim nidu'ugáty ujts mut ja muk tadyu'unan di'ibu yajkypy ja Dios di'ibu ijtrám winu xuu winu tiempu. <sup>8</sup>Es ja tsajptujk 'yujspejty mut ja jok di'ibu miimp ma ja Diosu myuj'ajtun es ja myuk'ajtun. Es ni pún mbaat oj kyatuku extu ko kyujxtaayñam ja juxtujkpu ayo'on di'ibu myunajxtup ja juxtujkpu ánkusaty.

### Ayo'ondsím

**16** <sup>1</sup>Nétats nmudooy pyudsemy ja kajxy tsajptugóty di'ibu tyuk'ane'empy ja juxtujkpu anklus:

—Nujxtu es tuktaamdu'uttu ja juxtujkpu tsim di'ibu myudajtypy ja muk tadyu'unan di'ibu Dios yajkypy naxwiñ.

<sup>2</sup>Ja jawyiimbú anklus oj ñejxy. Ta ttuktaamdúty ja tsyim naxwiñ. Net pyudseemy ja muk pu'uts ñikujxmety di'ibu muk jantsy pujkp ma nidugekyu di'ibáty myudajttup ja axuk juyujku syeyu es di'ibáty nandu'un 'yawdajttup ja awinnax.

<sup>3</sup>Net ja myumajtskpu anklus ttuktaamdúty ja tsyim jikymyejyñóty. Ta ja jikymyejyñ jyumbijty éxtamu ne'pyñ, du'un éxtamu o'kpu ne'pyñ. Ta 'yo'ktaadyu nidugekyu di'ibu jiky'ajttup jikymyejyñóty.

<sup>4</sup>Ja myudaguakpu anklus ttuktaamdúty ja tsyim majatyu majnuu es majatyu nuu myuxy. Ta jyumbijttaay ne'pyñ. <sup>5</sup>Nétats nmudooy ja anklus jyuna'añ:

—Dios, mijts m'ijt es mijts m'ijtrám. Wá'ats mij. Mdiimpy ja táy'ajtun es du'un xytyukkumadówt, <sup>6</sup>mut ko ttuktaam tuk'yojktu miju m'ayuk kajxwá'xpu ñe'pyñ, es miju mja'ayuty. Es tyam mij xytyuk'iiky ja ne'pyñ. Pes du'un ñitákuda.

<sup>7</sup>Nétats nmudooy nandu'un kyajxy extu ma artal, es jyuna'añ:

—Oyu du'un, Windsún Dios di'ibu tugekyu muk'ajtun myudajtypy. Tu xypyayo'oy yajxon mut ja táy'ajtun.

<sup>8</sup>Ja myumajtaxkpu anklus ttuktaamdúty ja tsyim ma ja xuu. Es mut yu'u ni'igu oj myuju ja xu'an es tsa'aydyut ja naxwíñudu ja'ayuty.

<sup>9</sup>Es dū'ən ja ja'ay jantsy muk tyooydyu mut ja xu'án. Per ni mut yu'u kyajodumbijttu, kyaj t'awdajttu Dios di'ibu yajkypu tyadu tudyu'unən. Ni'igu tmu''adugooy tmugajxtugooy ja Dios.

<sup>10</sup>Ja myumugoxkpu anklus ttuktaamdúty ja tsyim mā yajkutfky ja axuk juyujk. Ta kyoodsudyaay mā 'yane'emy. <sup>11</sup>Net ja ja'ayaty űayya'andsu'udsudu mut ja muk pūjkun di'ibu yajnajtup. Per ni mut yu'u tkamastuttu ja 'yaxuk winma'añ di'ibu tyuundap. Ni'igu tmu''adugooy tmugajxtugooy ja Dios.

<sup>12</sup>Ja myududujkpu anklus ttuktaamdúty ja tsyim mā ja Eufrates mājnən. Ta ja nū tyutsy es 'yawa'adsat ja tyu'u ja réyuty di'ibu miindap mā xū pyudsemy.

<sup>13</sup>Nétats n'ijxy mā ja sarpyentu 'yaa, es mā ja axuk juyujk 'yaa, es mā nandū'ən ja kyugajxpu di'ibu andakpu 'yaa, pyudsemy tugūgū mājku'u di'ibu kuxu'kp éxtamu nootsy. <sup>14</sup>Tyaadu yu'u dū'ənə mājku'ujaty di'ibu tyuundap ijxwū'əmən di'ibu myudajtypy ja māj'ajtun, es nūjx twowa'andu ja réyuty majaty naxwīñudu es űaymyujkta'ayudut es tsiptuna'andu mut ja Nindsun'ajtam Dios di'ibu tugekyu muk'ajtam myudajtypy, ko tpaadut ja tiempu. <sup>15</sup>“Mudowdu es jaygyúkudu. Eǵ, Diosu 'yU'unk, nmina'añats ti'oin, éxtam ko jya'ty ja ma'tspə. Jotkujk di'ibu naty wijy es witxu, kudiibu tsoydyu'un muut jyudítut niwa'ats uxwa'ats ja'ay wyinduuy.”

<sup>16</sup>Ta űaymyujkudu ja naxwīñudu réyuty mā ja lugaar di'ibu ebreeu ja'ayaty tyukxu'ajttap Armajedón.

<sup>17</sup>Ja myujxtujkpu anklus ttuktaamdúty ja tsyim pojotm. Ta yajmudooy kajxy mā Dios yajkutfky es mā ja tsajptujk jam tsajpótm, es jyunáñ muk: —ǵTə net tyuñ jyátyuty!

<sup>18</sup>Net myiñ ja anaa júdsuk, es ja naxwīñudu jyantsypyemiimy mut ja muk ujx. Kyaj ni windii dū'əmbu ujx kyanaxy extu mā tsyondaky ja naxwīñudu ja'ay. <sup>19</sup>Ta ja Jerusalén kajpn tsa'pxwa'xy tuguk peky. Es majaty kajpn naxwiñ jy'a'adugooydyaay. Es ja Dios tjamejtsy ja Babiloñ māj kajpn es tuk'uuga'añ ja vyinə, ja'a njuna'anum ja tudyu'unən di'ibu yajkypu mut ja 'yaku. <sup>20</sup>Net tugekyu islu es tugekyu kopk tyugooydyaay. <sup>21</sup>Nandū'ən kya'ay tsajpótm yu tatsn jantsy māj'jatyuty, extu justyikxy kilu jye'emdsyuty tu'ugáty. Es ja naxwīñudu ja'ayaty tmu''adugoy tmugajxtugóy ja Dios mut ja myuj ayo'onu tadu tatsn, mut ko muk ayo'onu dū'ən yu'u.

### Kujeñdyo'oxyu 'yayo'on

**17** <sup>1</sup>Net myiñ nidu'ugu nijxtujkpu anklus di'ibu myudajttu ja juxtujkpu tsm, es xy'anmaayuts:

—Min es nduk'ixut ja tyudyu'unən ja māj kujeñdyo'oxy di'ibu uñaapy mejyñwyingujxm. <sup>2</sup>Yu naxwīñudu ja'ayə réyuty tə űaygyayákudu es pyekyandu mut yu'u, es ja naxwīñudu ja'ayaty tə myu'uuk myumu'ugudu mut yu'u, ja'a njuna'anum t'axtijtu ja Dios es tranajxtu ja kujeñdyo'oxyu 'yaxuk winma'añ.

<sup>3</sup>Kodsu naty dū'ən tə xy'awanə, nétats ja anklus xymu'nejxy māj ittum. Jámut n'ijxy tu'ugu toxytyujk tuk'u'uñu tu'ugu tsapts axuk juyujk. Tadu axuk juyujk windikyə űini'x tmədaty mudu axuk ayuk kuxja'ay di'ibu

Dios muut twingajxpéty. Juxtujku kyubajk tmudaty es majku wyaj. <sup>4</sup>Tadu toxytyujk ñaywyítxuty mut ja tsu'unk wit esu tsapts wit, es 'yoydyúñuty mut ja oorú, mut ja tsujjátypyu tsaa esu perlu. Es tmudaty ky'ujóty tu'ugu oorú tsim ujts mut ja axuukpu. Ja'a tyaadu 'yandiipy ja 'yaxuk jiky'ajtun. <sup>5</sup>Es wyimbokkujxy tmudaty kuxja'ay tu'ugu xuu di'ibu tsip yajmudoop: "Ja Babiloñu muj kajpn, naxwíñudu kujeñdyo'oxyudyu tyaak es nandu'un tyaak'átyuty nidugekyu di'ibáty axuuk jiky'ajttup naxwiiñ." <sup>6</sup>Nétats nbejkyu kwentu ko tadu toxytyujk múkubu naty mut ja Diosu jya'ayudyu ñe'pyñ es mut ja ñe'pyñuty pánuty o'ktu mut ko t'awdajttu ja Nindsun'ajtam Jesukristu. Es kodsu taadu du'un n'ijxy, tats du'ũñ oj njantsywyu'amu.

<sup>7</sup>Nétadsu tadu anklus xy'anmaay:

—¿Ti ko du'ũñ mwe'emy? Tyam nduknijáwut di'ibu 'yandiipy yu ayu'udsyu winma'añ: tadu toxytyujk esu tadu axuk juyujk di'ibu tyuk'uñaapy, di'ibu myudajtypy juxtujku kyubajk es majku wyaj. <sup>8</sup>Tadu axuk juyujk di'ibu tu xy'ixy, yu'u tu'uk di'ibu jékyup jiky'ajt, es tyam kyaj ñakyjyaal'áty, per pudsumaamp kuk jutoty, es ñejxy ma kyutugooyñat.

'Ja naxwíñudu ja'ay di'ibu xyuu kya'ity kuxja'ay nekykyujxy extu ma naty kyajnumu naxwíñudu kyoj, ja'a du'ũñ wy'umadya'aydyut ko t'íxtut jatugok jya'ty ja axuk juyujk di'ibu jékyup jiky'ajt. Es yu xyujjaty di'ibu kuxja'ay ma ja neky, ja'a xyujjaty di'ibáty myudajttup ja jiky'ajtun winu xuu winu tiempu.

<sup>9</sup>Tyámats nnigajxut di'ibu tsojkup ja wijy'át kejy'át es yajjaygyúkt. Ja juxtujkpu kubajk ja'a 'yandiipy ja juxtujkpu kopk ma tadu toxytyujk 'yu'ũñ. <sup>10</sup>Es nandu'unu tadu kubajk, yu'u 'yandiipy ja juxtujkpu réyuty. Nimugoxk tu 'yooktu, ja myududujkpu tam yajkutíky tyam, es ja myujjuxtujkpu, yu'u kyajnum myiñ. Es ko myínut, je'eyu waanu 'yítut. <sup>11</sup>Es ja axuk juyujk di'ibu jékyup ijt es tyam kyaj ñakyjyaaty, yu'u du'un rey ma tadu nijjuxtujkpu, es jya'ta'añ jatugok éxtum ja myuduktujkpu rey, per ñajxpu du'un ma kyutugooyñat.

<sup>12</sup>Ja majkpu wyaj di'ibu tu xy'ixy, yu'u du'un majku rey di'ibu kyaj dyajtsonda'aktunum yajkutúktat. Per 'yaxajyándup ja kutujkun éxtumu rey tuk oorun mut ja axuk juyujk. <sup>13</sup>Tyadu majkpu réyuty ti'igyu wyinma'añuty, es myo'oyup ja myuk'ajttun es ja kyutujkun ja axuk juyujk. <sup>14</sup>Tsiptunaamp mut ja Borreegu'unk. Per ja Borreegu'unk mamada'agudup, mut ko yu'u Windsun'ajtp ma windsánuty es Rey'ajtp ma réyuty. Es di'ibáty yu'u muut, Dios wooju yu'ujjaty, wyin'ix, es oy tmadundu Dios.

<sup>15</sup>Ja anklus xy'anmaayats nandu'un:

—Tadu mejyñ di'ibu tu xy'ixy ma 'yu'ũñ ja kujeñdyo'oxy, yu'u du'un 'yandiipy ja ja'ay pánuty jiky'ajttup ma maygyajpn, ma wiinkpu may ayuk kajxputy, es ma mayñaxwíñudu. <sup>16</sup>Ja majkpu waj es ja axuk juyujk tyuk'ak'átup ja kujeñdyo'oxy, es dyajw'u'amat niwa'ats uxwa'ats. Es extu tsyu'tsta'aydyup ja ñini'x, es ñino'kta'aydyup di'ibu wu'amp. <sup>17</sup>Diosu du'un tu pyujta'agudu es dyajtuunudu Diosu wyinma'añ, ti'igyu ñaybyujta'agudu es dyaky ja kutujkun éxtumu rey ma ja axuk juyujk extu ko yajkuyduunda'ayut di'ibu Dios ñaskajxu. <sup>18</sup>Tadu kujeñdyo'oxy di'ibu tu xy'ixy, yu'u du'un 'yandiipy ja muj kajpn di'ibu 'yane'empy ja naxwíñudu ryéyuty.

### Babiloñu kajpn kyutugoy

**18** <sup>1</sup>Nétats n'ijxy jatu'ugu anklus jyanky tsajpótm mut ja myuj kutujkun. Ta ja naxwíñudu wye'emy kude'xy mut ja jyajun, <sup>2</sup>es muk kyajxy:

—Tu net, tu net jiyittat'ay ja Babiloñu muj kajpn, es tu jyumbity mujku'u tsunaaydyákn. Ni pún jap kyanaky'ity. Yu'u'yu je'e'yu jap tsunaaydyup ja ka'óbyuaty, es jyap'attu ni'amuku axuk joon axuk juyujk. <sup>3</sup>Du'un tu yajtu'yduñ mut ko ja Babiloñu kajpn tmastuty ja Dios, es wiinkpu t'awdaty, es nidugekyu naxwíñudu ja'ayuty ti'igyu mut yu'u. Es ja naxwíñudu réyuty pyekytuundu mut ja Babiloñu ja'ayuty. Esu ajuuy ado'kpu di'ibaty majatyu naxwíñudu, myukja'aydyáktu mut ko ttukmudeeky nidugekyu di'ibáty amdoop es ñayyajmujpudsuma'añuty.

<sup>4</sup>Nétats nmudooy jatu'ugu kajxy myiñ tsajpótm, es jyuna'añ:

—Pudsumdu ma tadu kajpn, miidsuty di'ibáty nja'ay'ajttup, kudiibu xymyutpekytyúndut es kudiibu miits myajtu'yduúndut mut yu'ujuty.

<sup>5</sup>Ja'la ko yu pyeky tu jyantsyñipajnu, extu myubátnup ja tsajp, es tu ja Dios jyamyajtsxuty ja pyojpu. <sup>6</sup>Tuunumbít nandu'un éxtamu wiinkpu tu t'axuktúñ. Múgubat majtsk du'unun éxtam yu'u tu dyaky, es taam'yo'oy majtsk du'unun myúkaty di'ibu ya'ukp éxtam yu'u oj ttaam'yo'oy. <sup>7</sup>Taydyún es ya'ayow nandu'un éxtam tu myuj tu pyaadu. Pes yu'u du'un jyuna'añ jyodoty wyinma'añóty: “Tyaats n'u'uñu éxtam tu'ugu reynu. Kyajts uj ngu'ekyty'oxyuty, ni na'ats nga'ayówat.” <sup>8</sup>Paaty ma tu'ugu xuu ti'in myínut ja pya'am, 'yayo'on, jyotmay, yuu, es mut ja janya'ank yajnino'ogut, mut ko Nindsun'ajttam Dios jyantsymyújuty di'ibu tu pyekymyo'oyuty es tkumadówat.

<sup>9</sup>Yu naxwíñudu réyuty di'ibu tu pyekytuundu mut yu'u es du'un tu dyajtgóydyu jyiky'ajttan, ñijuy ñiya'axttup ko t'ixttadu tadu kajpn ko tyoy. <sup>10</sup>Wu'umdaaydyup jagam jyantsytsyu'ugut mut ja tyuydu'unun, es jyuna'andut:

—iAy, puroobu mij Babiloñu muj kajpn di'ibu tu 'yane'emy! Jantsy tuk pojn tu myiñ ja mduydu'unun.

<sup>11</sup>Yu ajuuy ado'kputy majatyu naxwíñudu ju'uydyup nandu'un es pya'ayówdubu tadu muj kajpn, mut ko kyaj tnakypyaadut pún jyúyup ja tyeeky yaky, <sup>12</sup>mut ko ni pún tkanakyjyuydyu ja oorú, ja platú, ja tsujjátypyu tsaa, ja perlú, ja oyatypyu wit di'ibu tsu'unk, tsaptspu, seedubu, kanak naxu oyatypyu kepy di'ibu pa'ak xu'kp, ja tsujjátypyu di'ibu kojpu mut ja marfil, bronsu, pujxn es ja mármol; <sup>13</sup>es nandu'un ni pún tkanakyjyuydyu ja kanelu, pa'ak xu'kpu, mirru, poom, vinu, aseytu oliivú, arinu, triigu, tsajkaajuty, borreeguty, kwaayuty, kárruty, es extu ja'ayuty ijty tyo'ktup. <sup>14</sup>Es du'un yu ajuuy ado'kputy t'anuumudut tadu kajpn:

—Kyaj xyñakymyudatyu tadu mje'xy mbeky es tugekyu tadu oyatypyu di'ibu tu xyjantsytsyegy. Tuu dun tyugoodya'ay winu xuu winu timpu yu mmukja'ay'át esu mdsuj'ajttan.

<sup>15</sup>Pánuty ajuuy ado'ktup ma ja Babiloñu kajpn es ñayyajmukja'aydyu'agudu jap, jagam tyánudut mudu tsu'ugu ko du'un 'yayówat ja kajpn, es yu'u jyuy yu'axttut:

<sup>16</sup>—¡Ay, puroobu muj kajpn! Tsuj tu 'yity éxtam tu'uga toxytyujk mut ja wiyitá oyatypyu, tsu'unkpá, tsaptspá, es 'yoydyúñuty mut ja oorá, tsujjátypyu tsaa esu perlú; <sup>17</sup> ¡es tuk pojún tu tyúgoyu tyadu jyiky'ajtún!

Es nandu'un yu barku yaj'ye'ebuyty esu di'ibáty tuundup jap barkoty, es di'ibáty mæduundup jikymyejyñóty, wá'umduup jagam <sup>18</sup>ko t'íxtut pyude'eky ja jok má tyoyu tadu muj kajpn, es jyuna'andut muk:

—Ni maa du'ambu kajpn éxtam tu 'yityu tyadu muj kajpn, ¿kudii?

<sup>19</sup>Es mut ja jyotmay ñaydyukkuwujá'kudu naxway, es jyantsyjuu'uy jyantsyya'axtu:

—¡Puroobu tadu muj kajpn! Mut ja myukja'ay'át tu ñayyajmukja'aydya'agudu nidugekyu di'ibu myudajttup ja barku. ¡Es tuk pojún tu tyúgoodya'ay!

<sup>20</sup>Es ja kajxy 'yakjuna'añ tsajpótm:

—Miidsuty púnuty ijttup tsajpótm, es miidsuty apóstuluty esu Diosu 'yayuk kajxwa'xpruty esu nidugekyu di'ibu Dios jya'a'ajtypy, xonda'aktu mut ko Dios tu ttukkumudoy yu tadu kajpn éxtam tu mdúnudu.

<sup>21</sup>Net tu'ugu anklus kumujaaabu tkone'ky ja tsaa di'ibu du'un éxtam tu'ugu muj paan, es tkujubijpu jikymyejyñóty, es jyunañ:

—Nandu'un mij Babiloñu muj kajpn, myajkujubipnaxa'añ, es ni na'a jatugok mgakuxu'ugut. <sup>22</sup>Ni na'a kyanakyyajmudówt mgajpnóty ja trompet xuxpu, tsajkapyñxúxpu esu arpu koobu. Es ni kyanakyyajp'átut ja mmæduumbuty di'ibu xprékyuty, es ni má kyanakyyajmudówt jap ja jujts tu'unun. <sup>23</sup>Kyaj jap ñakyyajjut ni tu'ugu lampru, es ni na'a jap kyanakyyajmudówt yajtúñ ja xuu má ja pújkpruty. Ja m'ajuuy m'ado'kpruty tu 'yittu naxwiñ jantsy muj, es tu twin'uundu nidugekyu naxwíñudu ja'ayuty mut ja byuruja winma'añuty.

<sup>24</sup>Pes má tadu kajpn tu yajpaaty temy yeky ja Diosu 'yayuk kajxwa'xpruty ja ñe'pyñ, es ja ñe'pyñ di'ibu Dios jya'ay'ajtypy, es nidugekyu ja ñe'pyñ ja ja'ay di'ibuty ja'ay ya'o'kudu naxwiñ.

**19** <sup>1</sup>Nétuts nmudooy jantsy muk ja ja'ayuty kyajxta tsajpótm, es jyuna'andu:

¡Awdattu Dios!

Yu nitsokun, muj'ajtún esu muk'ajtún,

y'u Dios jya'a'ajtypy.

<sup>2</sup>Pesu Dios paye'epy mut ja tuy'ajtún,

es tu tmo'oy ja kumudo'on ja muj pekykyajpn es ñujxut ayodaknoty.

Mut ko tu dyajpekytyúñ ja naxwíñudu ja'ayuty

es dya'e'ky ja Diosu myæduumbuty,

paadyu Dios yajumbijtxuty.

<sup>3</sup>Net jyunandu jatugok:

—Awdattu Dios. Pes timjókup winu xuu winu tiempu má yajnine'egyuu taadu.

<sup>4</sup>Es ja ni'l'px majtáxkpu mujja'aydyujk es ja nimajtáxkpu jiky'ajtruty di'ibu ijttup Dios windum, ñaygyoxtonaaydyákudu, t'awdajttu Dios es jyuna'andu:

—Wa'an du'unuty. ¡Awdajtta'aydyu Dios!

<sup>5</sup>Nétats nmudoogajxy mā uñaaybyajn mā Dios yajkutíky, es jyana'añ: Miidsuty di'ibáty myuduundap ja Nindsun'ajtum Dios, mujja'ay mutsk ja'ayuty, awdattu Dios.

### Nixudún ja Borreegu'unk

<sup>6</sup>Nmudooyats nandu'un ko nimayja'ay kyajxtu, du'unuts nmudooy éxtumu nuudax 'yúatsy pyumimy, es éxtumu anaa muk ya'axy, es jyana'andá:

Awdajtta'aydyu ja Nindsun'ajtum Dios di'ibu tugekyu muk'ajtun myudajtypy, mut ko yajkutíky.

<sup>7</sup>N'okxondákum, n'okjotkujkum es n'okwindsu'kum, mut ko Dios jyantsymyújuty es tu net tpaaty mā ja Borreegu'unk pyuka'añ, es tu ja ñudo'oxy ñayjuj'ixyuty.

<sup>8</sup>Tu yajmo'oy ja wit ja oybyu es ja wá'atspu di'ibu tu'x judsujkp, es ñayxyóxudat.

Pes ja oybyu wit ja'a 'yandijpy ja oybyu di'ibu tyuun kyajxtup ja Diosu jya'ayuty.

<sup>9</sup>Nétats ja anklus xy'anmaay:

—Kuxja'ay: “Jotkujkaty di'ibáty tu yajwówdu mā tyadu xuu ko ja Borreegu'unk pyuka'añ.”

Es xy'ak'anmaayuts:

—Tyaada du'un tuy'ajtun di'ibu Dios kyajxypy.

<sup>10</sup>Njakoxtanayáñuts anklus tyeky'ujxy, es nja'awdatáñuts, per yu'uts xy'anmaay:

—Katú du'un m'adu'utsy. Nmudiimbyats ja Dios éxtum mij, es éxtumu mmugu'uguty di'ibu pyanajxtup ja Jesusu 'yuxpujkan. Awdat ja Dios.

Pes ja tuy'ajtun di'ibu Jesús yajk, ja'a yu'u di'ibu wyinma'añmyeepy ja Diosu kyugajxpu.

### Di'ibu tyuk'uñaapy ja poop kwaay

<sup>11</sup>Nétats n'ijxy ja tsajp awá'ats, es kyuxe'eky tu'ugu poop kwaay. Es di'ibu tyuk'uñaapy txu'aty Di'ibu Kyuydyiimpy Ja 'Yayuk, es nandu'un txu'aty Tuy'ajtun, mut ko tuy'ajtun muut pyayo'oy es tsiptún. <sup>12</sup>Yu wyiin du'un éxtumu junya'ank jyantsytye'xy, es jam kyubajkkujxm tmudaty may ja koronu. Es tmudaty ja xuu kuxja'ay di'ibu yu'ayu naydi'igyu ñija'ap. <sup>13</sup>Es ja wyit ne'pyñ ne'pyñ. Es txu'aty Diosu 'yAyuk. <sup>14</sup>Es pyanajxudu tugoymyay nidsiptuumbuty di'ibu tsajpótm. Ak poop ja wyit, ja oybyu es wá'atspu, es ak poop kwaaygyujxy. <sup>15</sup>Es di'ibu xyu'ajtypy Diosu 'yAyuk, jap 'yaajóty pyudsemy tu'ugu espaadu jajppu, es yu'u muut dyajtsayuta'añ ja naxwíñudu ja'ayuty. Es yajkutuka'añ mudu pujndajk. Es ttukkumudowa'añ, mut ko Dios di'ibu tugekyu muk'ajtun myudajtypy, jyantsy'ajkanu mut ja naxwíñudu ja'ay. Paadyu du'un ttukkumudowa'añ éxtum ko jyawu yajwinma'atsy ja uuvu tuump. <sup>16</sup>Es tmánejxy kuxja'ay mā ja kyapu es mā ja pyuuy tyadu xuu: “Rey'ajtp mā réyuty es Windsun'ajtp mā windsúnuty.”

<sup>17</sup>Nétats n'ijxy tu'uga anklus tyanu jam xuu ñikujxm es t'anuumadu jantsy muk ja joon juyujk di'ibu ka'agudijtp:

—iMin naymyúkudu ma ja muj xuu di'ibu Dios tyunaampy! <sup>18</sup>Min es xytsyu'utstat ja tsyu'udsyadyu réyuty esu soldaadu windsúnuty, ja jotmuk ja'ayuty, ja kwaayuty es mat ja di'ibu tuk'uñaayudap, nidugekyu ja'ay ja tsyu'udsyuty, púnuty yajjuudyup es púnuty awa'atstuuy ijttap, nandu'un ja muj ja'ay mutsk ja'aybyu.

<sup>19</sup>Nétats n'ijxy ko ja axuk juyujk es ja naxwíñudu ryéyuty dyajnaymyúkudu syoldaaduty es tsiptuna'añ mat ja di'ibu poop kwaagyujxy es mat ja ñidsiptuumbuty. <sup>20</sup>Per ja axuk juyujk yajtsuum ti'igyu mat ja kugajxpu di'ibu andakp, di'ibu naty tu ttuñ axuk juyujk wyinduuy ja muj ijxwu'amun di'ibu myudajtypy ja mujajtan. Es mudu tyadu muj ijxwu'amun ja kugajxpu di'ibu andakp tu twin'uundu naty di'ibáty tu ñayyákyuty es ja axuk juyujk tsa'ayadut, es t'awdajtta ja 'yawinnax. Net nimajtsk yajkujudu'uju jiigyuty ma yu mejyñ di'ibu teepy azufrú. <sup>21</sup>Es yu syoldaaduty ya'o'ktaay mat ja 'yespaadu di'ibu pudsump 'yaajóty di'ibu tyuk'uñaapy ja poop kwaay. Es nidugekyu joon juyujk di'ibu ka'agudijtp 'yujts jyotkudaktu mudu tadu tsyu'udsyuty.

### Mil jumujtpu

**20** <sup>1</sup>Nétats n'ijxy tu'uga anklus jyanaky tsajpótm mat ja kuk jutú 'yawatsn, es tkawítsyuty tu'uga muj kadenu. <sup>2</sup>Ta tmajtsy ja sarpyentu, tadu majku'ugópk, ja Satanás, es tkawu'uñ ttekywyu'uñ mat ja muj kadenu, es 'yítut tsimy tuk mil jumujt. <sup>3</sup>Ta tkujabijpu kuk jutoty, es dyajni'adijky ijxwu'amun muut kudiibu tnakywyin'uunat ja naxwíñudu ja'ayuty extu ko kya'pxut tuk mil jumujt. Ta naty koonam 'yok'yajnasmatsuya'añ waanu.

<sup>4</sup>Nétats n'ijxy uñaaybyajnaty, es jam 'yu'uñudu di'ibátyu naty tu t'axájudu ja kutujkun es pyayo'oydyut. Yu'adyu du'un di'ibu yajnibo't ja kyubajkaty mat ko tranujxtu ja Jesusu 'yuxpajkun es tkajxwa'xudu ja Diosu 'yayuk. Nandu'un kyaj t'awdajtta ja axuk juyujk es ni ja 'yawinnax, es ni tkakupajktu yajtsa'ayut wyimbokkujxy o ma ky'u mat ja axuk juyujku syeyu. Es ja Dios yajjikypuykudu, es 'yana'amdu mat ja Kristu tuk mil jumujt. <sup>5</sup>Tyaadu du'un ma tim jawyiinu Dios dyajjikypyejky ja ja'ayuty. Per di'ibu akwu'amdu ja o'kruty, yu'ujuty kyaj jyikyuyúktat extu ko kya'pxut tuk mil jumujt. <sup>6</sup>Kuni'xy es jotkujkaty di'ibátyu Dios yajjikypuykudap ma tyadu jawyiimbu jikyuyujkun. Kyaj pyaadudut ja ayo'on di'ibu du'un éxtumu ja'ay 'yooktu myumajtsk ok, ja'a du'un tmadúndut ja Dios esu Kristu éxtumu teedyuty, es 'yana'amdu mat ja Kristu tuk mil jumujt.

<sup>7</sup>Ko naty tu ñaxy tuk mil jumujt, ta Satanás yajnasmatsuya'añ ma tsyimy'ity. <sup>8</sup>Es net ñajxut naxwíñ, es nujx twin'uñ tugekyu naxwíñudu, ja Gook naxwíñudu esu Magook naxwíñudu. Ja Satanás yajnaymyujkta'ayudap nidugekyu naxwíñudu ja'ayuty di'ibu ni mbaat nga'okmadsyo'onu, du'un éxtumu pu'u di'ibu jikymyejyñbyu'aay, es tsiptuna'andu. <sup>9</sup>Oytyim madsooty ma tugekyu naxwíñudu ta tso'ondú, es dyajnadujktu nidugekyu Dios ja ja'ayuty ma ja kajpn di'ibu Dios jyantsytsyejpy. Peru Dios



dyajjanajky tsajpótmə jənya'ank di'ibu mʉut tnino'ktaay nidugekyə tadə ja'ayuty. <sup>10</sup>Net ja məjku'ugópk di'ibu naty ja'ay tu twin'uuñ, yajkujudu'uju mə ja mejyñ di'ibu teepy azufrə, mə naty nandu'un tu yajkujudúwə ja axuk jəyujk es ja kugajxpu di'ibu andakp. Jap 'yayówut xuuñ koots winu xuu winu tiempə.

### Payo'oyun mə ja poop uñaaybyajn

<sup>11</sup>Nétats n'ijxy ja Dios 'yu'uñu mə tu'ugu məj uñaaybyajn poorpə. Esə tsajp esə naxwíñudu jyugaktə mə naty 'yity, es ya'ijxtəgoodyaay. <sup>12</sup>Es n'ijxyəts ja o'kputy, məj mutsk, tyánudu Dios winduuy. Ta ja neky oj ya'aya'pwa'xy, es ya'ixy wi'ix tu tyundu nidu'uk nidu'uk. Es nandu'un wiinkpə neky ya'aya'pwa'xy mə 'yity kuxja'ay ja xuuujuty púnaty jiky'ajttəp winu xuu winu tiempə. Esə Dios tpayo'oy es ttukkumudooy ja o'kputy éxtəm nidu'uk nidu'uk tu 'yadu'utstə, də'un éxtəmə naty 'yity kuxja'ay nekykyujxm. <sup>13</sup>Tam 'yijttə tugekyə ja o'kputy, ja'a mʉut di'ibu o'ktə mejyñóty, es tugekyə yajpayo'oydya éxtəm tii tu ttundu. <sup>14</sup>Yə o'kun esə infyernə tu naty nandu'un dyajktə'aydya ja o'kputy tugekyə di'ibu naty yə'ujuty myudajttəp. Net ja o'kputy yajkujudúwədə mə ja mejyñ di'ibu ya'amp éxtəmə juun. Ko ja'ay jam 'yayowdə, də'un ja'a éxtəm 'yooktə myumajtsk ok. <sup>15</sup>Ja'ayə ja'ay di'ibu xuu kuxja'ay nekykyujxy mə yajjaaybyéty ja xuuujuty púnaty jiky'ajttəp winu xuu winu tiempə, yə'uyə kyaj yajkujudúwədə mə ja mejyñ di'ibu ya'amp éxtəmə juun.

### Jembyə tsajp esə jembyə naxwíñudu

**21** <sup>1</sup>Nétats n'ijxy ja jembyə tsajp esə jembyə naxwíñudu, mət ko yə jawyiimbə tsajp esə jawyiimbə naxwíñudu kyaj maanu, es kyaj maanu jikymeyjyñ.

<sup>2</sup>Es n'ijxyəts nandu'un ja jembyə Jerusalén kajpn di'ibu tso'omp tsajpótmə mə Dios, es kyada'aky, es jantsy tsuj oydyúñ éxtəmə pəjkpə toxytyujk ko pyuka'añ. <sup>3</sup>Es nmudoogajxyəts jantsy muk mə uñaaybyajn mə Dios yajkutíky, es jyuna'añ:

—Tyamə net ja Dios 'yity mət ja ja'ayuty, es jyiky'ata'añ mət yə'ujuty, es yə'ujuty tja'ay'ata'añ. Ku'am ja Dios 'yita'añ mət yə'ujuty, es Dyios'átədat. <sup>4</sup>Esə Dios yajtátsxədat tugekyə ja wyinnə. Kyaj 'yok'ijnət ja o'kun, ja'uy yaxən o ja pəjk ado'onən, ja'a ko tugekyə di'ibu tu 'yity, tu ja'a ñaxy kyexy.

<sup>5</sup>Net ja di'ibu uñaapy mə yajkutíky jyunáñ:

—Ujts nyajkejpy tugekyə ak jemy.

Nandu'un jyunáñ:

—Kuxja'ay, mət ko tyaadu di'ibuts ngajxypy, təy'ajttənu'u es mbaat xymyubeky.

<sup>6</sup>Nétats xy'anmaay:

—Tu net yajkuudyuunda'ay. Ujtsə də'un éxtəm ja A es éxtəmə Z, ujtsə də'un ja jawyiimbə es ja tim okpə. Di'ibu tátsəp, ujtsəts nnamo'oyəp es t'uugət ja nəə di'ibu pədsəmp mə myuxy es dyaky ja jiky'ajttəp. <sup>7</sup>Es di'ibu myumadakypy ja pojpn, yə'uts nmo'oyəbu tyaadu éxtəmə kyuma'añ, ujtsə də'un xyDyios'átəp, es yə'uts n'u'unk'átəp. <sup>8</sup>Per di'ibáty jyəjpja'adəp,

di'ibátyuts uj xykyamubujktup éxtumú Yajnutsókpú, di'ibáty jiky'ajttup axuuk, yajja'ay'o'ktup, mû'induundup, bruju'ajttup, 'yawdajttup di'ibu kyaj Dyíósuty, es nidugekyú di'ibu andáktup, taadaty nidugekyú pyaadudu es yajpujta'agut má ja mejyñ di'ibu teepy azufrú. Ko ja'ay jam 'yayowdu, du'un ja'a éxtumú ja'ay 'yooktu myumajtsk ok.

### Jembyu Jerusalén

<sup>9</sup>Nétuts xyñimiñ nidu'ugu anklus di'ibu tá ttuktaamdu'uty ja tsyim mut ja ayo'on, esuts xy'anmaay:

—Min es nduk'ixut di'ibu pyukaampy ja Borreegu'unk.

<sup>10</sup>Net mudu Espírítu Santu myuk'ajtun oj xyajnejxyuts má tu'ugu muj kopk jantsy kujxm, es xytyuk'ijxyuts ja muj kajpn Jerusalén kuni'xypyú ko kyuda'aky, jam tso'oñ tsajpótm má Dios 'yity. <sup>11</sup>Esú tadú kajpn jantsy tû'xp mut ja Diosú jyajun. Esú tyu'xun du'un éxtumú tsujjátypyú tsaa, éxtumú tsaa'ju'unk di'ibu xú'ajtypy jaspe, wá'ats éxtumú viidru. <sup>12</sup>Es juwudity ja kajpn ñabótsyuty majpxy es kujxm, mut majmajtskú tyujk aa. Es tu'uk tu'ugu tujk aa tmudaty tu'ugu anklus di'ibu kywentu'ajtypy. Es má tadú tu'uk tu'ugu tujk aa 'yity kuxja'ay tu'ugu xyúú ja majmajtskpú Israelú myaank. <sup>13</sup>Tugúuk 'yixy ja tujk aa má xúú pyudsemy, tugúuk 'yixy má yukpoj myiñ, tugúuk 'yixy má ja xúú tsi'lity es jatugúuk 'yixy má myiñ ja jamboj. <sup>14</sup>Ja potsy di'ibu ñabots'ajtypy ja kajpn, majmajtskú 'yujx tmudaty. Es má ja majmajtskpú potsy ujx kuxja'ay 'yity tu'uk tu'ugu xyúú ja nimajmajtskpú Borreegu'ungú 'yapóstulú.

<sup>15</sup>Yú anklus di'ibuts xymyugajx tmudaty tu'ugu oorú kijxn, es tkijxa'añ ja kajpn, ja tyujk aa es ja ñabots. <sup>16</sup>Ja kajpn kwadraadu 'yity, yú yeñ'ajtun ti'igyú mut ja wyooñ'ajtun. Ja anklus tkijxy ja kajpn mut ja kyijxn, esú yeñ'ajtun wyinjajty majtsk mil jamajtsk mugo'px kilometrú. Yú yeñ'ajtun, ti'igyú yú'ú mut ja kyujxm'ajtun esú wyooñ'ajtun. <sup>17</sup>Net tkijxy ja wyooñ'ajtun ja ñabots, es wyinjajty tugu'px mugoxk metrú. Ja kijxn di'ibu ja anklus yajtiimpy, du'un ja yeñ'ajtun éxtum di'ibu ja'ay yajtiimpy.

<sup>18</sup>Ja kajpn nabots pyótsyudyú naty mut ja jaspe tsaa. Es ja kajpn, ak tim wá'ats oorú, du'un kyuxe'eky éxtumú viidru wá'atspú. <sup>19</sup>Ja kajpn nabots pyotsy'ujx mut kanak naxú oyatypyú tsaa. Ja jawyíimbu tsaa txu'aty jaspe. Ja myumajtskpú txu'aty zafiiru, ja myuduguukpú txu'aty ágatú, ja myumajtáxkpú txu'aty esmeraldú, <sup>20</sup>ja myumugoxkpú txu'aty ónise, ja myududujkpú txu'aty kornalinú, ja myujxutujkpú txu'aty krisólítú, ja myuduktujkpú txu'aty berilú, ja myudaxtujkpú txu'aty topasyú, ja myumajkpú txu'aty krisoprasú, ja myumajk tu'ukpú txu'aty jasintú, ja myumajmajtskpú txu'aty amatistú. <sup>21</sup>Ja majmajtskpú tujk aa, majmajtsk je'eyú ja perlú. Tu'uk tu'ugu tujk aa, ti'igyú je'eyú t'agaj'áty ja perlú. Es ja muj tu'u di'ibu kajpngijky, ak tim wá'ats oorú, éxtumú wá'ats viidru.

<sup>22</sup>Es kyajts n'ijxy ni tu'ugu tsajptujk jap, mut ko yú Nindsun'ajtun Dios di'ibu tugekyú muk'ajtun myudajtypy, esú Borreegu'unk, yú'ú tsyajptujk'ajttubu tadú kajpn. <sup>23</sup>Tadú kajpn kyaj tseky esú xúú es ni yú po'o ñi'ánudat, mut ko Dios esú Borreegu'unk, ja'a jyajun muut kyude'xyuty. <sup>24</sup>Es ja jajun má tadú kajpn, ja'a kyudu'xup nidugekyú naxwíñudu ja'ay, es

ja naxwíñudu réyuty tmámíndut ja myukja'ay'át ma ja kajpn. <sup>25</sup>Du'uhum wya'umut awa'ats ya kajpn nabots aa. Ni na'a kya'adúkat, mat ko jap kyaj kyoodsuya'añ. <sup>26</sup>Es ja naxwíñudu ja'ay tmámíndut ja myuj'ajtun es ttukwindsu'ugudut ja Dios. <sup>27</sup>Es ni na'a kyatákudu di'ibu axuuk, o di'ibu tsoydu'un mat, o win'u'umbaty, yu'uyu tákudap di'ibu xuu ijtp kuxja'ay jap Borreegu'unk ñekykyujxy ma yajjaaybyéty ja xuuajaty pánuty jiky'ajttap winu xuu winu tiempu.

**22** <sup>1</sup>Nétats ja anklus xytyuk'ijxy tu'ugu majnuu di'ibu mujxp ma uñaaybyajn ma Dios esu Borreegu'unk yajkutúktu. Tadu nuu jantsy wa'ats éxtumu viidru, es yu'u du'an yajkupy ja jiky'ajtun winu xuu winu tiempu. <sup>2</sup>Tadu nuu pyae'eky maj tu'ugijky ma tadu kajpn. Es majnuub'aay majtsk adu'um yoñ ja kepy di'ibu yajkupy ja jiky'ajtun es tyuamp'áty majmajtsk ok tuk jamajtpu, wínduk po'o'jaty tyuamp'áty. Es ja kepy'aay yu'u tsooy'átap ja naxwíñudu ja'ayuty. <sup>3</sup>Es ni ma kyanaky'ítat ni tii di'ibu kajxpojkr.

Ma tadu kajpn, Dios esu Borreegu'unk yajkutuka'andu, esu myuduumbaty 'yawdata'anudu, <sup>4</sup>es 'yíxtap ja Dios ja wyiin jyujp, es tmudáttut ja Diosu xuu ma wyimbok. <sup>5</sup>Jap kyaj kyoodsuya'añ. Es di'ibáty ijttap jap, kyaj ttsóktut ni ja lyampru es ni yu xuu ñijájudut, mat ko yu Nindsun'ajtam Dios kudu'xánup, es yajkutúktut winu xuu winu tiempu.

#### Tsojk ja Kristu myina'añ

<sup>6</sup>Nétadsu anklus xy'anmaay:

—Tyadu ayuk, tuj'ajtunu'u es mbaat xymyubuktu. Paadyu Nindsun'ajtam Dios di'ibu wyinma'añmyeepy ja kyugajxpaty, yu'u tu tkexy ja 'yanklus es yajtuk'ixa'andu ja myuduumbaty di'ibu tsojk tunán jatánup.

<sup>7</sup>Du'an ja Jesukristu jyuna'añ:

—¡Mudoo'íttu! ¡Tsojkuts nmina'añ!

¡Jotkujk di'ibáty pyaduundup ja n'uxpxjukunats di'ibu ijtp kuxja'ay ma tyadu neky!

<sup>8</sup>Uj Fwank. N'ijx nmudoots tugekyu tyadu. Es kots n'ijxtaay nmudoodaay, taats nnaygyoxtnaaydyáku anklus tyeky'ujxy di'ibudsu naty tu xytyuk'ixy, es nja'awdatáñuts. <sup>9</sup>Per yu'uts xy'anmaay:

—Kátats xy'awdaty. Nmudiimbyats ja Dios, éxtum mij, es éxtumu mmugu'uguty di'ibu Dios ja 'yayuk kyajxwa'xudup, es nidugekyu di'ibáty pyaduundup ja Diosu 'yuxpxjukun di'ibu ijtp kuxja'ay ma tyadu neky. ¡Awdat ja Dios!

<sup>10</sup>Es ja anklus xy'ak'anmaayats:

—Kajxwa'x yajxónu tyadu Diosu 'yuxpxjukun. Katu xykyuyu'utsy, mat ko tu dun tyimpaty ja tiempu ma yajkuydyuna'añ. <sup>11</sup>Pánuty axuuk adátstap, wa'anu du'an t'aktimtuun'adu'utstu; es pánuty pyanujxtap ja ka'oybyu winma'añ, wa'anu du'an t'aktimpanujx'adu'utstu; es pánuty pyanujxtap ja tuj'ajtun, wa'anu du'an t'aktimpanujx'adu'utstu; es pánuty kyuyduundup ja Diosu wyinma'añ, wa'anu du'an t'aktimkuydyuun'adu'utstu.

<sup>12</sup>Du'anu Jesukristu jyuna'añ:

—¡Tsojkuts nmina'añ! Es kots nmínat, nmo'oya'añats nidu'uk nidu'uk éxtum pyaadyuty wi'ixáty tu jyiky'attu. <sup>13</sup>Ujtsu du'an éxtum ja A es éxtumu

Z, ujtsu du'un ja jawyiimba es ja tim okpa. Ujtsu du'un di'ibu tugekyu yajtsondák, es ujtsu du'un nandu'un di'ibu ya'abatadyaapy. <sup>14</sup>Jotkujkudyu taaduty di'ibáty tu tpujtu yajxonu wyit, ja'a njuna'anum di'ibu tu jyodumbittu es tu tmastu'uttu ja pyojpa. Yu'udyu dun je'eyu pátudap tyákut ma tadu kajpn es tju'xut ja ujts tuump di'ibu yajkypy ja jiky'ajtun winu xuu winu tiempu. <sup>15</sup>Mat ko ni na'a mbaat kyatákuda jap di'ibu myudajttup ja axuk winma'añ, yu brújaty, ma'induumbuty, yajja'ay'o'kpaty, yu di'ibu 'yawdajttup di'ibu kyaj Dyíósuty, es di'ibáty tsojktup tyuundap ja andakun.

<sup>16</sup>Uj Jesús, tuts ngexy ja n'anklus es t'awánut nidugekyu ja mubujkpatujk ma ñaymyúkuda. Ujtsu du'un ja Davitu tuump 'yaats, es ujtsu du'un éxtumu jayxyuu di'ibu móñum pudsuump.

<sup>17</sup>Yu Espírítu Santu esu Borreegu'ungu ñado'oxy, ja'a njuna'anum ja ja'ay di'ibu myubujktup ja Jesukristu, ja'a junándap:

—¡Min!

Es di'ibu myumudeepy, wa'an nandu'un tjuna'añ:

—¡Min!

Es di'ibáty tútsudap, wa'an tmindu es t'axájudut nadu'uñu ja nuu di'ibu yajkypy ja jiky'ajtun winu xuu winu tiempu.

<sup>18</sup>Uj n'anmaabyuts nidugekyu di'ibáty myudoo'ijttup yu Diosu 'yayuk di'ibu ijtp kuxja'ay ma tyadu neky, pun ja pún tnikón yu tyaadu di'ibu ijtp kuxja'ay, Dios nandu'un niko'onxudap ja 'yayo'on di'ibu ijtp kuxja'ay ma tyadu neky. <sup>19</sup>Es pun ja pún oynu'unun tpuwitsy yu ayuk di'ibu ijtp kuxja'ay ma tyadu neky, Dios nandu'un puwijtsxudap di'ibu naty pátap tju'xut ja kepytuump di'ibu yajjiky'ajtp, es kyaj tyákut ma ja Diosu kyajpn. Yu kepytuump esu Diosu kyajpn kuxja'ay 'yity ma tyadu neky.

<sup>20</sup>Di'ibu tyaadu ñigajxypy, du'un jyuna'añ:

—Tsojkuts nmina'añ.

Es nandu'unuts njuna'añ:

—Wa'an du'unuty. ¡Min, Nindsun'ajtam Jesús!

<sup>21</sup>Wa'ana Nindsun'ajtam Jesús tkunu'xtu nidugekyu ja Diosu jya'ayaty.